

清

史

稿

清史稿

列傳十二

額亦都

費英東

子多  
孫

何和禮

子多  
孫

安費揚古

扈爾漢

額亦都鈕祜祿氏世居長白山以資雄鄉里祖阿陵阿拜顏移居英嶗峪父都陵阿巴圖魯歲壬戌額亦都生幼時父母爲仇家所殺匿隣村以免年十三手刃其仇有姑嫁嘉木瑚察長穆通阿往依焉穆通阿子哈思護長額亦都二歲相得甚懽居數歲庚辰太祖行經嘉木瑚察宿穆通阿家額亦都與太祖語心知非常人遂請從其姑止之額亦都曰大丈夫生世間能以碌碌終乎此行任所之誓不貽姑憂翌日遂從太祖行是歲太祖年二十二額亦都年十九太祖爲族人所惹數見侵侮矢及於戶額亦都護左右卒弭其難居三年歲癸未太祖起兵額亦都從討尼堪外蘭攻圖倫城先登攻色克濟城掩敵無備取之獲其牛馬甲士又別將兵攻舒勒克布占克其城額亦都驍果善戰挽強弓十石

能以少擊衆所向克捷太祖知其能日見信任歲丁亥八月令將兵取巴爾達城至渾河秋水方至不能涉以繩約軍士魚貫而渡夜薄其城率驍卒先登城兵驚起拒跨堞而戰飛矢貫股著於堞揮刀斷矢戰益力被五十餘創不退卒拔其城師還太祖迎於郊燕勞其所俘獲悉畀之號爲巴圖魯薩克察來攻額亦都率數卒出禦爲所敗夜入其城進攻克尼瑪圖章家二城索爾瑚寨師還太祖迎勞如初界藩有科什者以勇聞盜九馬以遁額亦都單騎追斬之盡返所盜馬嘉木瑚人貝揮巴顏謀叛附哈達太祖命額亦都討之誅其父子五人以徇歲癸巳九月葉赫等九部合師來侵攻我黑濟格城太祖親禦之陣於古勒山令額亦都以百騎挑戰敵悉衆來犯奮擊殲九人敵卻我師乘之禽葉赫貝勒布賽九部師皆潰遂乘勝略諾賽寨及兆佳村有齊法罕者戰沒額亦都直入敵陣以其尸還訥股路者九部之一也其長搜穩寨克什旣敗歸復衆七寨之衆守佛多和山自固太祖命額亦都偕噶蓋安費揚古以兵千人圍其寨克之斬搜穩寨克什太祖以所乘馬賜之歲己亥秋從征哈達滅之歲丁未五

月從貝勒巴雅喇等伐東海渥集部取赫席黑俄漠和蘇魯佛訥赫拖克素等  
三路俘二千人九月從征輝發滅之歲庚戌十一月太祖命將兵千撫渥集部  
那木都魯綏分寄古塔尼瑪察四路降其長康古禮等十九人旋乘勝取雅攬  
路俘萬人歲辛亥太祖命偕何和禮扈爾漢將兵二千伐渥集部虎爾哈路圍  
札庫塔城三日招之不下遂攻克其城斬千級俘二千人環近各路悉降令其  
長土勒仲額勒仲護其民五百戶以還歲癸丑從征烏拉滅之歲乙卯定旗制  
額亦都隸滿洲鎮黃旗天命建元置五大臣以命額亦都國語謂之達拉哈轄  
二年命偕安費揚古攻明馬根單花豹衝三岔兒諸堡皆克之四年明經略楊  
鎬大舉來侵總兵杜松軍自撫順入三月甲申朔諸貝勒帥師出禦日過午師  
至太蘭岡大貝勒代善以太祖未至議駐軍以俟太宗時號四貝勒謂界藩有  
我築城夫役宜急護之何爲次且示弱額亦都大言曰四貝勒之言是也師遂  
進師至界藩築城夫役騰躍下山赴戰太祖亦至指揮夾擊松軍遂覆還破馬  
林於尙間崖劉綎於阿布達里岡額亦都並爲軍鋒太祖有所征討額亦都皆

在行間未嘗挫衄每克敵受賜輒散給將士之有功者不以自私太祖厚遇之始妻以族妹後以和碩公主降焉額亦都次子達啟少材武太祖育於宮中長使尙皇女達啓怙寵而驕遇諸皇子無禮額亦都患之一日集諸子譙別墅酒行忽起命執達啓衆皆愕額亦都抽刃而言曰天下安有父殺子者顧此子傲慢及今不治他日必負國敗門戶不從者血此刃衆乃懼引達啓入室以被覆殺之額亦都詣太祖謝太祖驚惋久之乃嗟歎謂額亦都爲國深慮不可及也累官至左翼總兵官一等大臣給以百人廩食食三世分所部爲世管牛象三分隸鎮黃正白二旗六年克遼陽賜第一區六月卒年六十太祖臨哭者三天聰元年追封弘毅公崇德初配享太廟順治十一年世祖命立碑旌功親爲製文詳著其戰閱以爲忠勇忘身有始有卒開拓疆土厥績懋焉額亦都子十六人其知名者徹爾格爾格爾登超哈爾邁必隆皆自有傳四子韓代五子阿達海及阿達海之子阿哈尼堪並以從征戰死七子諱海蚤歲從軍屢立戰功仕至都統亦戰死十五子索渾從太宗戰伐有功授世管牛象額眞累遷至

議政大臣額亦都初授一等總兵官康熙間改襲一等精奇尼哈番乾隆元年改一等子圖爾格別封公爵以其從孫阿里衮及阿里衮子豐昇額父子相繼有功進一等果毅繼勇公高宗諭額亦都後已進一等公其初封子爵仍紹封如故

費英東瓜爾佳氏蘇完部人父索爾果爲部長太祖起兵之六年歲戊子索爾果率所部五百戶來歸費英東時年二十有五善射引強弓十餘石忠直敢言太祖使佐理政事授一等大臣以皇長子台吉褚英女妻焉兌沁巴顏者費英東女兄之夫也有逆謀費英東擒而誅之旋授札爾固齊扎爾固齊職聽訟治民太祖命費英東伐瓦爾喀部取噶嘉路殺其酋阿球降其衆以歸歲戊戌正月太祖命費英東從台吉褚英巴雅喇伐瓦爾喀部安褚拉庫路將兵千克屯寨二十餘收所屬村落歲己亥秋九月哈達葉赫二部搆兵哈達貝勒孟格布祿乞援於太祖太祖命費英東及噶蓋將兵二千戍哈達既而貳於明費英東等以其謀聞哈達以是亡歲丁未春正月瓦爾喀部蜚悠城長策穆特黑請徙

所部屬太祖太祖命費英東從貝勒舒爾哈齊等將兵三千以往收環城居民五百戶分兵二百授扈爾漢使護之先行烏喇貝勒布占泰發兵萬人要諸途費英東從諸貝勒督後軍至大敗烏喇兵夏五月太祖命費英東從貝勒巴雅喇伐渥集部略赫席黑等路俘二千人以還歲辛亥秋七月渥集部烏爾古辰木倫二路掠他路太祖所賜甲太祖命費英東從台吉阿巴泰將千人討之俘千餘人以還歲癸丑從太祖伐烏喇滅之歲乙卯太祖將建號設八旗命費英東隸鎮黃旗爲左翼固山額眞置五大臣輔政以命費英東仍領一等大臣札爾固齊如故明年歲丙辰太祖遂建國改元天命三年始用兵於明費英東從攻撫順明總兵張承蔭以萬騎來援據險而陳火器競發費英東馬驚旁逸諸軍爲之卻費英東旋馬大呼麾諸軍並進遂破之太祖歎曰此眞萬人敵也四年明大舉來侵分道深入明總兵杜松屯薩爾濟山巔費英東所部屬左翼合諸旗奮擊破之松戰死明師以是沮敗秋八月太祖伐葉赫費英東從薄其城城人飛石投火太祖命且退費英東曰我兵已薄城安可退也又命之費英東

曰城垂克必毋退遂拔其城太宗諭金台石降費英東在側相與詰責卒獲金台石葉赫以是破費英東事太祖轉戰每遇敵身先士卒戰必勝攻必克摧鋒陷陳當者輒披靡國事有闕失輒強諫毅然不稍撓佐太祖成帝業功最高五年春三月太祖定武功爵授費英東三等總兵官是月費英東卒年五十有七方疾革日向西雲起有聲鏗錙雷電雨雹交至不移時而薨太祖將臨喪諸貝勒以日晏諫太祖曰吾股肱大臣與同休戚今先彫喪吾能無悲乎遂往哭之慟至夜分始還秋九月太祖祭貝勒穆爾哈齊墓出郊因至費英東墓躬奠酒者三泣數行下天聰六年太宗命追封直義公崇德元年始建太廟以費英東配享太宗嘗諭羣臣曰費英東見人不善必先自斥責而後劾之見人之善必先自獎勵而後舉之被劾者無怨言被舉者亦無驕色朕未聞諸臣以善惡直奏如斯人者也順治十六年世祖詔曰費英東事太祖參贊廟謨恢擴疆土爲開創佐命第一功臣延世之賞勿稱其勳命進爵爲三等公康熙九年聖祖親爲文勒碑墓道稱其功冠諸臣爲一代元勳雍正九年世宗命加封號曰信勇



乾隆四十三年高宗復命進爵爲一等公費英東子十圖賴自有傳索海費英東第六子襲總兵官旋坐事奪職太宗天聰五年初置六部授刑部承政七年與兵部承政車爾格偵明邊至錦州有所俘獻命管牛象事崇德三年更定部院官制改都察院左參政十月從太宗伐明略大凌河下屯堡十四復授刑部承政四年索倫部博木博果爾等降而復叛命索海及工部承政薩木什喀帥師往討之克雅克薩兀庫爾二城進攻鐸陳城博木博果爾以六千人來援乘我師後索海設伏以待破敵俘四百乘勝入其壘博木博果爾遁去索海率諸將攻挂喇爾屯攻克之屯兵五百斬級二百俘百三十還逐敵額蘇里屯西額爾圖屯東俘六千九百五十六人牛羊駝馬稱是師還命貝勒杜度阿巴泰迎勞太宗幸實勝寺賜宴敘功授二等甲喇章京兵部勅索海行軍不立寨俘有通者當奪賞命賞之六年春從睿親王多爾袞等出師圍錦州坐私遣官兵歸離城遠屯徵還與譚泰阿山葉克書等皆罰鍰夏復從多爾袞等出師圍錦州城兵出行汲小凌河索海以兵四百邀擊斬九十餘級遂從攻松山擊破明軍

時有敏惠恭和元妃之喪索海召降將祖大樂俳優至其帳歌舞刑部論索海當死削職上使諭之曰爾既就逸樂姑自娛於家自今毋至篤恭殿及大清門前索海遂坐廢終太宗世不復用世祖順治二年以副都統從征四川卒於軍子多顏羅以從入關擊流賊有勞授牛錄章京進一等甲喇章京十四年從信郡王多尼征雲南戰死磨盤山倭黑費英東諸孫父察哈尼方索海嗣父爵而黜也太宗以納海圖賴分襲既又以事奪爵復以察哈尼襲尋改三等昂邦章京卒子倭黑襲世祖初元從入關四年復更定爵秩改二等精奇尼哈番遇恩詔累進一等十六年進三等公並授內大臣康熙八年聖祖龍奮拜吏部議倭黑與同族富黜命罷內大臣隸驍騎營吳三桂反倭黑從征十三年命以署副都統率兗州駐防兵佐定南將軍希爾根進討敗耿精忠將左宗邦於分宜敗吳三桂將朱君聘黃乃忠於袁州遂收安福擊賊鸞石嶺白水口屢捷十五年加太子太保從大將軍安親王岳樂復萍鄉至長沙擊敗吳三桂兵十六年岳樂分兵授倭黑令駐茶陵十七年移屯攸縣十八年從大將軍貝子章泰下雲

南授鑲黃旗蒙古副都統雲南平二十一年擢都統議政大臣議賭將帥功罪以倭黑擊賊長沙嘗引退當譴命罷太子太保三十年卒子傅爾丹自有傳何和禮棟鄂氏其先自瓦爾喀遷於棟鄂別爲一部因以地爲姓何和禮祖曰克徹巴顏父曰額勒吉兄曰屯珠魯巴顏世爲其部長何和禮年二十六代兄長其部棟鄂部素強克徹巴顏與章甲城長阿哈納相仇怨阿哈納興祖諸孫爲甯古塔六貝勒之一棟鄂屢侵甯古塔甯古塔借兵哈達伐棟鄂互攻掠太祖初起兵聞何和禮所部兵馬精壯乃加禮招致之歲戊子太祖納哈達女爲妃何和禮率三十騎衛行比還遂以所部來附太祖以長女妻焉何和禮故有妻挾所部留故地者求與何和禮戰太祖面諭之乃罷兵降旗制初定何和禮所部隸紅旗爲本旗總管歲戊申從太祖征烏喇率本旗兵破敵有功歲辛亥太祖命與額亦都扈爾漢將兵伐渥集部虎爾哈路克扎庫塔城歲癸丑從太祖再征烏喇太祖招諭布占泰猶冀其悛悔何和禮與諸貝勒力請進攻遂滅烏喇天命建元旗制更定何和禮所部隸正紅旗置五大臣何和禮與焉四年

從破明經略楊鎬六年下瀋陽遼陽何和禮皆在行間敘功授三等總兵官九年八月卒年六十有四時費英東額亦都安費揚古扈爾漢皆前卒太祖哭之慟曰朕所與並肩友好諸大臣何不遺一人以送朕老耶太宗朝進爵爲三等公順治十二年追諡溫順勒石紀功雍正九年加封號曰勇勤子六多積禮何和禮次子初授牛彙額眞事四貝勒從伐烏拉天聰間擢甲喇額眞從伐錦州圍大凌河授游擊世職崇德元年帥師伐東海瓦爾喀部俘壯丁三百餘擢本旗梅勒額眞四年與鎮國公扎喀納率兵屯藩屏二城間卒竊馬遁去追之勿及論罪奪世職籍沒上命留弓矢甲冑及三馬仍領梅勒額眞事六年從擊洪承疇率騎兵循海追捕斬獲甚衆七年以老罷順治五年卒和碩圖何和禮四子初襲三等總兵官太祖以大貝勒代善女妻焉號和碩額駙太宗卽位授正紅旗固山額眞天聰元年從擊朝鮮又從伐明攻錦州寧遠有功二年從貝勒阿巴泰帥師破錦州杏山松山諸路九月復伐察哈爾克其四路軍以功加五牛彙進爵三等公三年從貝勒岳託帥師攻大安口敗明戍兵於馬蘭峪再敗

明援兵於石門寨復從太宗攻遵化率本旗兵攻其城西北克之師薄燕京結營土城關明兵來攻擊卻之復敗明師於蘆溝橋與副都統阿山等陳斬明武經略滿桂總兵孫祖壽獲黑雲龍麻登雲師旋克永平帥騎兵守灤州五年從圍大凌河城以本旗兵當其西北明兵突圍出與都統葉臣等夾擊破之追奔及城濠而還七年上詢伐明及朝鮮察哈爾三國何先和碩圖疏言宜先葺治諸城堡乃覘明邊乘瑕而入若天佑我各城納欵勢不能速歸南界六城立界屯耕修築可差後慮我兵既出敵伺其隙鞭長不及難爲援也潘陽牛莊耀州三城宜先繕完庶邊界內外皆可長驅七月和碩圖卒上親臨哭之順治十二年追諡端恪都類何和禮第五子公主出也初爲牛泉額眞洵擢本旗固山額眞以公主子增領兩牛泉崇德元年從太宗伐朝鮮薄漢城先登城潰率阿禮超哈兵入城搜剿以失察所部違法亂行罰綏奪所分俘獲三年從貝勒岳託伐明次密雲牆子嶺明將以三千人來拒都類與譚泰督部將來擊大敗之獲馬百駝二十軍分四道進所當輒摧破略地至濟南而還四年從鄭親王濟爾

哈朗圍錦州坐所部退縮又受蒙古饋遺罰鍰未幾所部訐告都類在山東時縱所養盜馬私發明德王埋藏珍物坐論死上貸之奪職籍沒八年復起爲固山額真鎮錦州順治三年從肅親王豪格征張獻忠分兵定慶陽會師西充擊殺獻忠與貝勒尼堪等戡定川北州縣師還論功並遇恩詔累進二等伯十三年卒

安費揚古覺爾察氏世居瑚濟寨父完布祿事太祖有章甲尼麻喇人誘之叛不從又劫其係以要之終無貳志安費揚古少事太祖族制定隸滿洲鑲藍旗歲癸未太祖兵初起仇尼堪外蘭克圖倫城攻甲版薩爾濟城長諾米訥奈喀達陰助尼堪外蘭漏師期尼堪外蘭得遁去太祖憾諾米訥奈喀達執而殺之使安費揚古率兵取其城康嘉者太祖再從兄弟也悉太祖英武與羣從謀以哈達兵至俾兆佳城長李岱爲導劫瑚濟寨旣引去安費揚古方獵聞有兵與巴遜以十二人追及擊破之歲甲申正月從太祖攻兆佳城獲李岱其黨李古里扎泰走附汪泰安費揚古以太祖命往諭並汪泰降之六月從太祖攻馬兒

墩寨寨負險守者甚備矢石雜下攻三日不克安費揚古夜率兵自間道攀崖而上拔其寨歲丁亥六月太祖伐哲陳部八月克洞城歲戊子九月克王甲城安費揚古皆從戰有功尋攻克章甲尼麻喇赫徹穆諸城又取香潭寨其長李墩拜湖遁走追及於碩郭之陽俘以獻歲癸巳六月太祖略哈達富爾佳齊寨師還太祖躬勅兵以殿哈達貝勒孟格布祿率騎追至一騎出太祖前太祖方引弓射復有三騎突至太祖馬幾墜三騎揮刀來犯安費揚古截擊盡斬之太祖亦射孟格布祿中馬踏敵騎敗走太祖嘉其勇賜號碩翁科羅巴圖魯九月太祖既破九部師閏十一月命與額亦都噶蓋等攻訥殷路佛多和山寨斬其長搜穩寨克什歲己亥九月從太祖滅哈達歲辛亥七月命與台吉阿巴泰等伐渥集部烏爾古辰木倫二路取其地俘其人以歸歲癸丑正月從太祖滅烏喇師落城安費揚古執繼先登尋置五大臣安費揚古與焉天命元年七月命與厄爾漢帥師伐東海薩哈達部至兀爾簡河剝木爲舟水陸並進取河南北三十六寨八月丁巳師至黑龍江之陽江水常以九月始冰是日當駐師處獨

冰寬將六十步若浮梁安費揚古曰此天佑我國也策騎先涉衆競從之師畢  
度冰旋解遂取江北十一寨降使犬諾洛石拉忻三路三年四月太祖取撫順  
明總兵張承蔭等赴援分爲三營安費揚古擊其左營大破之遂乘勝取三岔  
兒諸堡四年破明經略楊鎮滅葉赫六年取瀋陽遼陽安費揚古皆在行間七  
年七月卒年六十四順治十六年追諡敏壯立碑紀其功太宗嘗諭羣臣曰昔  
達海庫爾纏勸朕用漢衣冠朕謂非用武所宜我等寬袍大袖有如安費揚古  
勞薩其人者挺身突入能禦之乎當日猛士如雲而二人尤傑出云子達爾岱  
阿爾岱碩爾輝達爾岱以甲喇額真事太宗伐明攻大凌河守臧家堡取錦州  
寧遠征朝鮮皆有功順治二年授拖沙喇哈番七年追叙安費揚古功進一等  
阿達哈哈番康熙五十二年聖祖念安費揚古開國勳別授三等阿達哈哈番  
令其孫明岱分襲阿爾岱子都爾德及碩爾輝孫遜塔皆有功受爵世祖朝別  
有傳

扈爾漢佟佳氏世居雅爾古寨父扈喇虎與族人相仇率所部來歸是歲戊子



太祖起兵之六年也。扈爾漢年十三，太祖養以爲子，稍長，使爲侍衛，旗制定，隸滿洲正白旗。扈爾漢感太祖撫育恩，誓效死戰。輒爲前鋒。瓦爾喀部蜚悠城初屬烏喇貝勒布占泰，待之虐。丁未正月，城長策穆特黑請徙附太祖。太祖命貝勒舒爾哈齊等將三千人迎之。扈爾漢從，既至蜚悠城，收環城屯寨，凡五百戶。使扈爾漢與揚古利率兵三百護以前行。布占泰發兵萬人，邀諸路。扈爾漢結寨山巔，使蜚悠城來附者五百戶入保，分兵百人衛之。自率二百人與烏喇兵萬人各據山爲陳，相持使馳告後軍。翼日烏喇悉衆來戰，揚古利迎擊烏喇兵，稍退。會後軍至，奮擊大破之。夏五月，太祖命貝勒巴雅喇將千人伐渥集部。扈爾漢從取赫席黑俄漢和蘇魯佛訥赫控克索三路，俘二千人。己酉冬十二月，復命扈爾漢將千人伐渥集部，取渚野路，收二千戶。以還太祖，嘉其功，賚甲冑及馬，賜號達爾漢。辛亥冬十二月，復命扈爾漢及何和禮額亦都將二千人伐渥集部。虎爾哈路克扎庫塔城斬千餘級，俘二千人。撫環近諸路，收五百戶。以還癸丑，太祖討烏喇。扈爾漢及諸將皆從戰，奪門入，遂滅烏喇。太祖置五大臣。

扈爾漢與焉先是太祖與明盟畫界戒民毋竊踰違者殺母赦至天命初將十年明民越境採參鑿礦取樹木果蔬殆歲有之太祖使扈爾漢行邊遇明民踰塞取而殺之凡五十餘輩太祖遣綱古里方吉納如廣甯廣甯巡撫李維翰繫諸獄而使來責言且求殺踰塞民者太祖拒不許既乃取葉赫俘十人戮撫順關下明亦釋使者是年秋七月太祖命扈爾漢及安費揚古將二千人伐薩哈連部道收兀爾簡河南北三十六寨遂進攻薩哈連部取十一寨降其三路語詳安費揚古傳四年春二月明經略楊鎬大舉四道來侵三月太祖督軍禦之扈爾漢從貝勒阿敏先行與明游擊喬一琦遇擊敗之時朝鮮出軍助明其帥姜宏立屯孤拉庫嶺一琦收殘卒匿朝鮮營扈爾漢從諸貝勒擊明軍戰於薩爾汗破明將杜松等戰於尙間崖破明將馬林等扈爾漢皆在行間明將劉綎自寬奠入董鄂路牛叢額真托保等戰不利扈爾漢帥師與托保合軍憑隘爲伏諸貝勒軍出瓦爾喀什林劉綎將率兵登阿布達里岡爲陳扈爾漢引軍扼其衝諸貝勒繼至東西夾擊破之綎戰死明兵遂燔五年太祖取瀋陽扈爾漢

清 身 系  
從擊明總兵賀世賢等敗之歷加世職至三等總兵官八年冬十月卒年甫四十八太祖親臨其喪扈爾漢諸子渾塔襲三等總兵官其後不著準塔別有傳阿拉密襲準塔世職附見準塔傳

論曰國初置五大臣以理政聽訟有征伐則帥師以出蓋實兼將帥之重焉額亦都歸太祖最早巍然元從戰閱亦最多費英東尤以忠讜著歷朝褒許稱佐命第一何和禮安費揚古扈爾漢後先奔走共成軍路藍縷之烈積三十年輔成大業功施爛然太祖建號後諸子皆長且才故五大臣沒而四大貝勒執政他塔喇希福祖羅屯傳言列五大臣或初闕員時營簡補歟草昧傳聞蓋不可深考矣

清史稿

列傳十三

揚古利

勞薩 子 程尼

圖魯什 子 巴什惠

覺羅拜山 子 納仿  
子 納仿 吳格 厚額

西喇布 子 納仿  
子 納仿 納喇 阿爾 納珠 納喇 阿子 納珠 沙布

達音布 子 納仿  
子 納仿 納喇 阿爾 納珠 納喇 阿子 納珠 沙布

巴篤理 子 納仿  
子 納仿 納喇 阿爾 納珠 納喇 阿子 納珠 沙布

揚古利舒穆祿氏世居渾春父耶柱爲庫爾喀部長率先附太祖時通往來太祖遇之厚命揚古利入侍耶柱爲部人所戮其妻襁負幼子納穆泰於背屬鞮佩刀左右射奪門出以其族來歸部人尋亦附太祖揚古利手刃殺父者割耳鼻生啖之時年甫十四太祖深異焉日見信任妻以女號爲額駙旗制定隸滿洲正黃旗太祖令揚古利守汎鴨綠江警備嚴密無敢犯者伐輝發多壁城阻

水不得進揚古利亂流而濟衆從之遂薄城多所俘馘歲癸巳略朱舍里路納  
殷路戊戌略安褚拉庫路皆有功歲己亥從克哈達揚古利先登禽貝勒孟格  
布祿歲丁未正月徙蜚悠城衆揚古利與扈爾漢率兵三百護行烏喇以萬人  
要諸路揚古利勵衆曰吾儕平居相謂死於疾寧死於敵此非臨敵時乎持矛  
突陳殺烏喇兵七敵稍卻夾河相持諸貝勒軍總至大破之五月從貝勒巴雅  
喇等伐渥集部取赫席黑路爲前鋒馬兒古里村人驚兵至走負山因攻據其  
山巔馳下擊之盡殲丁壯俘子女以歸九月伐輝發越柵二重先入奪其城歲  
庚戌七月從台吉阿巴泰等伐渥集部略木倫路克吳兒瑚麻村望林中烟起  
即馳赴之往復者三俘獲甚衆歲壬子九月從討烏喇攻金州城城中迎射拒  
揚古利冒矢攻克之歲癸丑正月再討烏喇揚古利先衆進戰攻清河烏喇貝  
勒布占泰兵甚銳太祖傳矢命諸將退揚古利持不可應衆迫城聚一隅疾攻  
遂拔之天命四年三月明經略揚鎬大舉來侵總兵杜松等攻界凡大貝勒代  
善等帥師禦之我軍屯吉林巖明軍屯薩爾滸山兩軍相薄揚古利與貝勒阿

巴泰等爭先赴敵破其軍松等皆戰死是夕明總兵馬林以兵至營於尙間巖翌旦移兵往攻太祖命被創者勿往揚古利裹創繫腕率十牛象兵憑高馳擊林兵大潰七月攻鐵嶺遇蒙古貝勒介賽兵擊破之遂獲介賽六年三月從太祖攻瀋陽濠深恆堅衆難之揚古利拔刀揮本旗兵先登奪敵所植竹箴以阻軍者遂克之進攻遼陽復先登陷陳破其步卒奪河橋與明兵戰於沙嶺大敗之遼陽既拔太祖嘉其戰多屢受創命位亞八貝勒統左翼兵授一等總兵官誠勿更臨陳十年揚古利守耀州明將毛文龍遣兵三百來攻略城南蕎麥衝揚古利率兵追擊盡殲之旋進三等公天聰三年九月同阿山等捕逃人至雅爾古遇文龍所部越塞探獲者擊殺九十六人獲千總三及其從者十六人以還十月從伐明薄明都擊敗滿桂兵於城北礮兵陷敵伏中揚古利率親軍十餘人奪圍入悉出之軍還從貝勒阿巴泰等略通州焚舟千餘攻薊州明軍來援太宗督右翼三旗攻其西貝勒代善等督左翼四旗攻其東右翼兩紅旗兵少卻揚古利率正黃旗兵直前突陳敵敗走太宗命兩紅旗將佐納綏自贖以

賜揚古利揚古利分界將士不自私六年太宗伐察哈爾命貝勒阿巴泰等及揚古利居守明兵來侵諸貝勒禦之錦州戰明兵銳甚六旗俱卻揚古利大怒獨率本旗兵奮擊破之旋復從太宗入明邊攻大同宣府與貝勒阿巴泰等拔靈邱墮王家莊取之七年六月太宗諸諸將兵事揚古利言用兵不可曠隔若踰年不用敵以其時乘閒修備慮誤我再舉我暇一年再征不暇亦一年一征乃爲善策我今當深入敵境克城堡貝勒諸將已痘者駐守未痘者從上還都不克則縱兵焚其村聚民降者編伍拒者俘以還各旗獻俘視牛象爲多寡兵士所獲聽自取若此則人人貪得不待驅迫爭出私財買馬兵氣益揚矣戍邊貝勒許番代他將卒不許番代不耐勞苦豈有能拓地成功業者乎或謂用兵數且妨農婦子相隨且行且穫何妨農之與有朝鮮察哈爾宜且置之山海關外寧遠錦州亦當緩圍但深入腹地腹地既得朝鮮察哈爾自來附矣時諸大臣所見亦略同太宗遂定策伐明八年五月復錄揚古利前後戰功進超品公位亞貝勒帽頂嵌珠崇德元年五月命武英郡王阿濟格饒餘貝勒阿巴泰及

揚古利帥師伐明入邊克畿內諸州縣凡十二城五十八戰皆捷獲總兵巢丕昌等俘十餘萬出邊擊敗三屯營山海關援兵九月師還太宗出都十里迎勞獻捷設宴親酌卮酒賜三帥十二月論伐明諸將遼律阿濟格出邊不親爲殿揚古利坐不諍罰土黑勒威勒十二月太宗親伐朝鮮揚古利從二年正月師濟漢江屯江岸朝鮮全羅忠清二道兵來援營漢城南是月丁未太宗命豫親王多鐸及揚古利擊之值雪陰晦敵陳於山下縱兵進擊自巔至其巔多鐸鳴角招揚古利登山督戰揚古利將馳赴朝鮮敗卒伏崖側竊發烏鎗中揚古利創重遂卒時年六十六明日多鐸率兵逼敵營朝鮮兵已夜遁得揚古利尸以歸太宗親臨哭奠賜御用冠服以殯喪還太宗迎於郊命陪葬福陵葬日太宗復親奠揚古利初事太祖凡在行間率先破敵衝鋒挫銳所向披靡太宗誠不令臨陳而遇敵忘軀奮發不自己行軍四十餘年大小百餘戰功業絕特而持身尤敬慎太宗嘗命本牛象護軍爲之守門賜豹尾槍二以親軍二十人爲衛其葬以本牛象八戶守冢是年十一月追封武勤王立碑墓道順治中世祖命



配享太廟康熙三十七年聖祖巡盛京謁陵親奠其墓三十九年復建碑爲文表績雍正九年定世爵爲一等英誠公揚古利子二長阿哈旦以軍功授拖沙喇哈番次塔瞻襲超品公擢內大臣崇德六年八月太宗親將禦明洪承疇戰於錦州敵遁命塔瞻設伏追擊斬獲甚衆尋移營松山明總兵曹變蛟夜率兵突近御營塔瞻不能禦降一等公順治四年卒以其子愛星阿襲愛星阿自有傳

勞薩瓜爾佳氏世居安褚拉庫太祖伐瓦爾喀部取安褚拉庫勞薩來歸旗制定隸滿洲鎮紅旗天命六年從伐明克遼東授游擊天聰二年從伐蒙古多特羅部進二等參將三年從伐明薄明都與圖魯什等敗敵德勝門外斬五十餘級獲馬數十進一等參將八旗選精銳爲前鋒號噶布什賢勞薩驍勇善戰使爲將號噶喇依章京每出師前行偵敵所向有功五年八月從伐明圍大凌河城上聞明援兵自錦州至遣勞薩與圖魯什以兵二百偵敵上與貝勒多鐸以兵二百繼其後明兵至逐勞薩等至小凌河突近上前上渡河躬陷陳後軍亦

至共擊敗之時我將覺善被圍又有裨將與敵戰敵揮刃將及勞薩直前奮擊  
悉拯之出還白上上親酌金卮以勞明監軍道張春等合馬步兵四萬渡小凌  
河嚴屯拒戰勞薩受上指領進而前力戰破敵壘十月復與圖魯什往錦州松  
山偵敵遇明兵奔寧遠斬其執纛者十餘人十一月聞察哈爾兵至勞薩率兵  
百偵敵會察哈爾兵引去追擊之逾興安嶺勿及甲仗駝馬委於道者悉收以  
還六年四月從伐察哈爾師次博羅額爾吉勞薩率兵前行收蒙古流散者二  
百餘人五月與阿山率兵百至喀喇莽奈偵敵遇察哈爾邏卒逐而斬之我國  
諜者劉哈爲敵困敵兵殆百人勞薩以七騎大呼破圍入挾之出敵披靡敗走  
尋偵察哈爾汗棄地遁已遠還白上上乃自布龍圖班師至祐案勞薩還與大  
軍會七年上命勞薩與圖魯什等將三百人略寧遠分其兵兩翼突入沙河所  
斬三百人獲裨將一牲畜二百七十八年二月復略錦州松山邊境往錦州投  
書明總兵祖大壽五月與圖爾格率兵出邊渡遼河沿張古台河屯戍衛蒙古  
扼明兵勞薩屢以寡勝衆功多進三等副將賜號碩翁科洛巴圖魯十二月察

哈爾部衆來歸命勞薩將百人迎護九年四月從貝勒多爾袞收降察哈爾部衆師還略明邊勞薩夜率兵進敗甯武關兵遂毀關入進略代州復進略忻州度黑峯口遇明邏卒四十人悉擊斬之獲其馬崇德元年偕吳松等貢書諭明松棚路潘家口諸戍將因偵敵邊隘多所俘獻上伐朝鮮命勞薩與戶部承政馬福塔以兵三百先爲賈人裝畫夜行將至朝鮮其戍將出禦力戰盡殪其衆朝鮮國王李倬使勞師郊外以其間走南漢山城師還吏議勞薩備不嚴使倬得走當奪世職論劄上命毋奪職二年授議政大臣三年二月從伐喀爾喀上使勞薩齎書諭明宣府將吏歸歲幣開市勞薩獲喀爾喀四十餘人收其財物牲畜縱使去師還吏議勞薩罪當死上特宥之八月從貝勒岳託杜度伐明自密雲牆子口入岳託奏言噶布什賢將領勞薩等逐潰兵得明邏卒誦知牆子嶺堅不易拔嶺東西高處可越分軍四路深入明兵合馬步八千人拒戰阿蘭泰所將蒙古兵稍卻勞薩與圖賴等奮戰陷陳明兵敗去其夜復至勞薩擊卻之遂入其壘又率所部逐敵斬百七十餘級俘九十獲馬百三十有奇進二

等梅勒章京五年五月與吳拜偵敵廣寧邊境自中後所入循海而南斬二百級上自將攻錦州勞薩伏兵高橋縱敵弗擊論罪降世職奪賜號六年四月從鄭親王濟爾哈朗伐明圍錦州設伏擊明兵松山獲馬百九十勞薩逐明兵見敵援至使騎馳問濟爾哈朗曰敵援至若之何濟爾哈朗以爲怯聞於上上曰勞薩素勇敢且身被重創不當議小過五月明總督洪承疇以兵六萬援錦州屯松山北我師未集勞薩力戰敗其前鋒會上命睿郡王多爾袞等濟師復與戰大敗之勞薩行塔山東偵敵獲敵騎克錦州外城九月命復勞薩世職賜號旋代洪尼喀爲梅勒章京是月上自將督多爾袞等與承疇決戰勞薩從多爾袞陷陳力戰死之既克敵上遣內大臣携酒臨奠卹贈三等昂邦章京以其子程尼襲程尼既襲職三遇恩詔進一等伯任議政大臣順治九年從敬謹親王尼堪征湖南十一月及明將李定國戰於衡州我師敗績沒於陳卹贈拖沙喇哈番十二年追諡國初以來有功諸將勞薩諡忠毅程尼諡誠介並立石紀績勞薩弟羅璧初以軍功授阿達哈哈番至是併襲程尼世職進爲二等公卒其

子降襲一等伯再傳無嗣乾隆間續封二等子

圖魯什伊爾根覺羅氏世居葉赫歸太祖旗制定隸滿洲鎮黃旗天命九年爲牛彖額眞蒙古有亡者逐得之十年命率兵至旅順口捕盜俘獲甚衆擢甲喇額眞授游擊世職天聰三年從太宗伐明圖魯什先驅偵敵至大安口城下兵出戰圖魯什單騎奮擊師繼至克之自遵化向明都明兵自薊州踵師後圖魯什設伏擊卻之十二月上軍明都西南令圖魯什與梅勒章京阿山循城覘敵多寡獲諜言明總兵滿桂黑雲龍麻登雲孫祖壽合兵四萬屯永定門南二里許還白上且曰敵盛宜及其不虞乘夜擊之夜三鼓秣馬蓐食八旗及蒙古左右翼兵俱進圖魯什率所部先馳入敵壘敵陳亂師從之明師遂敗斬桂祖壽獲雲龍登雲與勞薩席爾納等往來游擊屢有斬馘四年正月從貝勒阿巴泰濟爾哈朗逐斬叛將劉興祚進二等參將既復從貝勒阿敏守永平諜告明兵且至圖魯什以四十人偵之巴篤禮屯布祿等以百人策應共擊敗明別將張宏謨兵語詳巴篤禮傳已而明兵大至阿巴敏棄永平引師還命往視邊牆率

兵五十爲三隊麾使後獨與四騎先至塞下蒙古數十人猝起相薄兩垣間環而射之圖魯什突圍出顧所將騎卒皆陷圍中一騎中矢且仆復大呼馳入援三騎挾傷者俱歸五年八月從伐明攻大凌河明援兵二千自松山至圖魯什與阿山勞薩等以兵二百迎擊敗之斬百餘級獲三羣還上酌金卮勞之九月攻錦州明援兵自錦州至與勞薩從上破敵語詳勞薩傳復遵上指令軍中張旗幟舉礮僞若明兵來援致城兵出戰伏起敵敗走明監軍道張春等集諸路軍來援渡大凌河屯長山圖魯什先以偏師邀擊小勝戊戌之夕上親督騎兵襲敵壘圖魯什先進兩軍力戰卒破明師獲張春十月偵錦州松山斬明兵執難者十一月遂察哈爾兵踰興安嶺六年從伐察哈爾次博羅額吉招流亡皆與勞薩偕上令哈爾占具糗糒儲烏蘭哈達而以甲喇額真顏布祿牛象額真董山司轉運愆期糧糒不時至吏議當死上命覆讞衆皆言法不當宥圖魯什言讎者上申諭臨陳而退當斬然亦嘗恩宥今罪顏布祿董山而貸其死實惟上恩上從之八年二月略錦州五月擢噶布什寶噶喇依昂邦進三等副將六

月復從伐察哈爾七月至歸化城遇察哈爾諸宰桑以千二百戶來降率以謁  
上是月毀明邊牆入大同與瑚什布等擊敗明總兵祖大弼軍略地至宣化攻  
懷遠設伏左衛城擊敗明總兵曹文詔軍上駐左衛城西使圖魯什如宣府偵  
敵閏八月乙酉遇大弼偵卒十五人圖魯什單騎馳擊矢中其腹猶力戰不已  
斬二人俘十三人圖魯什創甚上親迎視之丁亥卒於軍賜號碩翁科羅巴圖  
魯進三等總兵官順治間追諡忠宣子巴什泰襲爵事世祖三遇恩詔進一等  
伯順治九年三月在上前爲蒙古侍衛瑣尼所戕進三等侯子珠拉岱襲康熙  
間定封一等精奇尼哈番乾隆元年改一等子

覺羅拜山景祖弟包朗阿曾孫也景祖兄弟凡六分城而居包朗阿次第五居  
尼麻喇城太祖既起兵族人慧太祖英武謀欲害太祖包朗阿子孫獨不與率  
先事太祖太祖起兵之三年攻哲陳部托漠河等五城合兵戰於界凡包朗阿  
諸孫札親桑古里皆從拜山事太祖差後旗制定隸滿洲鎮黃旗天命六年從  
太祖伐明攻濟陽明將有號禿尾狼者驍悍善戰拜山禮諸陳明兵悉衆自城

南來拜山迎戰斬副將一遂降其衆既克遼東授游擊天聰元年從太宗伐明攻錦州未下移師攻寧遠錦州兵潛出蹙師後拜山與牛衆額真巴希競起還擊戰死太宗親臨其喪醑酒哭之賜人戶牲畜贈三等副將子顧納岱襲顧納岱既襲職天聰八年改三等梅勒章京崇德二年從伐明戰於山海關敗明兵逐敵至豐潤師或出探薪明兵起乘之顧納岱馳赴奮擊援以歸徇山東擊敗明內監馮永盛總兵侯應祿克博平進一等梅勒章京順治元年顧納岱以擺牙喇叢章京從睿親王多爾袞入關擊李自成十月從豫親王多鐸逐自成至陝州賊依山爲陳顧納岱與圖賴率擺牙喇兵馳擊斬獲大半二年二月自成將劉元亮以千餘人夜覘我師顧納岱出擊敗之鑲黃正藍正白三旗兵繼進賊大奔遂克潼關逼西安加半個前程三月從豫親王徇河南渡淮四月至揚州與伊爾都齊等率擺牙喇兵軍於城南獲舟二百餘翼日合師薄城下七日而拔進克明南都溯江至蕪湖擊明將黃得功敗其舟師移師從貝勒博洛徇蘇州克崑山攻江陰發礮破城顧納岱先登復移師趨浙江略平湖水陸並勝



收其戰艦攻嘉興明兵出禦背城爲陳順納岱與固山額眞恩格圖漢岱等合擊之三戰三勝七月師還進三等昂邦章京四年從豫親王征蘇尼特部討騰機思騰機思走喀爾喀分遣蒙古兵追擊敗之於歐特克山復自土喇西行敗喀爾喀兵於查濟布喇克尋以恩詔進二等精奇哈番五年從征南將軍譚泰下江西討金聲桓至九江擊破聲桓兵進攻南昌中砲沒於陳贈一等精奇尼哈番以其子莫洛渾襲莫洛渾授參領順治十七年從安南將軍達素徇福建討鄭成功攻廈門死之聖祖以拜山顧納岱莫洛渾三世死王事贈莫洛渾三等伯益剛勇太祖始起諸族人未附有龍敦者爲景祖第三兄索長阿子於太祖爲從叔撓太祖尤力太祖討尼堪外蘭討李岱漏師期又搆太祖異母弟薩木占殺噶哈善哈思虎皆龍敦所爲也然其從子旺善事太祖太祖再攻兆佳城取甯古親旺善爲敵踏敵俯撲出刃將刺太祖未及甲直入發矢中敵額殪援旺善起其後屢從征伐天命十年偕達珠瑚車爾格以千五百人伐瓦爾喀部俘獲甚衆上出郊迎之行抱見禮慰諭甚至太祖既盛強龍敦子鐸弼托博

輝皆從天命七年太祖伐明使鐸弼與貝和齊蘇把海留守遼陽太宗初即位設八大臣以托博輝領正藍旗又有土穆布祿爲景祖幼弟寶實諸孫十年命與阿爾代毛海光石等屯耀州太宗設十六大臣使與薩璧翰爲托博輝佐又有耶球巴哈納皆索長阿之裔俱致通顯自有傳

西喇布世居完顏以地爲氏太祖初起兵率所部來歸常翼衛太祖授札爾固齊歲癸巳略富爾佳齊哈達人西忒庫抽矢射貝勒巴雅拉西喇布以身當之中二矢遂卒卹贈游擊子二噶祿馬喇希旗制定隸滿洲鑲紅旗噶祿襲職從攻沙嶺有功進二等參將卒無子馬喇希天聰九年授佐領尋襲其兄噶祿世職崇德二年從都統業克舒等伐卦勒察三年七月授刑部理事官八月遷蒙古梅勒額眞四年再遷固山額眞從睿親王多爾袞圍錦州坐徇王貝勒等私遣兵歸離城遠駐罰如律復從貝勒阿巴泰等入黃崖口所至克捷順治元年四月從睿親王多爾袞入關破李自成追擊至慶都十二月與都統阿山征陝西自蒲州渡河擊賊諭功進一等甲喇章京兼半個前程尋命移師從豫親王

多鐸下江南二年五月自歸德渡河至泗北淮河橋明守將焚橋走師夜濟與都統宗室拜音圖以紅衣砲攻克武岡寨引兵而東至常州明將黃蜚以步兵數萬禦戰擊破之遂下宜興道破明水軍至崑山都統恩格圖等方攻城馬喇希率所部兵趨頰堞先登遂克之復拔常熟師還進三等梅勒章京四年八月從肅親王豪格徇陝西至漢中叛將賀珍走西鄉馬喇希與都統繁拜分兵馳擊及於楚湖斬賊甚衆進二等阿思哈尼哈番五年睿親王多爾袞出獵馬喇希坐與都統噶達渾等私獵貶秩八年世祖親政昭復職再遇恩詔進三等精奇尼哈番九年九月命與定南將軍護軍統領阿爾津帥師定廣東十月命移軍鎮漢中十二月復命移軍定湖廣辰州常德諸路十一年卒十二年世祖命追錄國初以來有功諸將皆視一品大臣予諡立碑墓道於是西喇布薩順壯馬喇希諡忠僖太祖諸將當帝業未成効死行間與西喇布同時易名紀績者又有札爾固齊阿蘭珠梅勒額眞納爾察阿蘭珠棟鄂氏世居瓦爾喀什父阿格巴顏與其兄對齊巴顏並爲屯長太祖攻杭佳城守城者爲阿格巴顏妻父

令助守阿格巴顏不可日以德誅亂宜也吾安能助亂而拒有德乎尋與對齊巴顏各率所屬歸太祖旗制定隸滿洲鑲紅旗對齊巴顏子噶爾瑚濟阿爾珠皆授牛叅額真分轄所屬阿蘭珠旋擢札爾固齊從伐烏拉直前衝擊人馬皆被創下馬步戰遂沒於陳郵贈三等甲喇章京以其弟布爾堪襲順治間追諡順毅布爾堪襲職授甲喇額真天聰四年與武賴哈寧阿等率精兵百略明邊獲明諜三遂渡大凌河斬四十餘級俘百六十八年重定各牛叅所屬人戶以新附瑚爾哈百人增隸布爾堪尋戍牛莊獲蒙古逃人進二等甲喇章京崇德元年卒納爾察鈕祜祿氏世居安圖隸蘇克蘇濟河部國初來歸授備禦隸滿洲鑲黃旗歲戊申從太祖討烏喇攻伊罕阿林城先登克之擢梅勒額真後攻沙嶺不待大軍至獨進沒於陳以長子佛索里襲世職順治間追諡端壯瑚沙納爾察次子初授牛叅額真天聰六年從太宗伐明入大同與圖魯什等行偵敵遇明兵四百瑚沙彎弓躍馬疾馳入陳敵皆披靡略地至崞縣屢擊敗明兵崇德三年從貝勒岳託伐明與熬拜先驅遇明騎兵三百突出搏戰瑚沙以入

騎擊卻之遂率左翼擺牙喇兵越燕京徇山東明太監高起潛等率兵出禦瑚沙與羅什等連戰皆捷遂北數十里上以佛索里不勝任畀瑚沙襲世職爲噶什布賢章京六年從伐明攻錦州轉戰松山杏山間屢有斬獲七年加半個前程十月貝勒阿巴泰等帥師伐明上命瑚沙從俟師入邊以軍事還報八年春師還使瑚沙從噶什布賢噶喇昂邦努山等以兵九十人詣界嶺口迎師俘敵甚衆順治初從入關擊李自成戰於一片石瑚沙率本旗噶什布賢超哈當自成將唐通逐自成至慶都復從噶什布賢噶喇昂邦席特庫設謀誘敵夾擊破之六月從固山額真葉臣征山西至汾州偕甲喇額真道喇圖爾賽等擊破自成將白輝二年從英親王阿濟格征陝西克綏德延安牛象額真哈爾漢俄班駐軍南山爲賊所乘戰死瑚沙率數騎突入得其尸以還自成奔湖廣追勦至安陸擊敗自成將邵章掠其舟以東至九江口與席特庫率前鋒二十人破賊壘逐自成至於九宮山自成既殄瑚沙復與甲喇額真蘇拜希爾根等逐捕餘賊斬二千餘級進三等甲喇章京三年從肅親王豪格討張獻忠於漢中擊敗

叛將賀珍遂獻忠至於西充獻忠引衆迎戰瑚沙奮擊敗之肅親王遂痘獻忠五年進二等阿達哈哈番六年從鄭親王濟爾哈朗略湖南時明桂王由榔猶駐廣西其總督何騰蛟守湘潭師既克長沙渡湘水攻之前鋒兵薄城敵分三門出戰瑚沙與席特庫力戰破城西兵生致騰蛟明兵潰遂克湘潭於是衡州寶慶永州辰州諸郡縣次第皆下進二等阿思哈尼哈番九年擢鎮黃旗蒙古副都統命與學士蘇納海使朝鮮鞫獄十一年兼任工部侍郎十二年擢本旗蒙古都統授議政大臣十五年從信郡王多尼下雲南十六年從克永昌十七年師還以永昌初下縱兵入城擾民降三等阿思哈尼哈番康熙三年卒分世職爲二第五子瑚弼圖襲一等阿達哈哈番第二子碩伯海襲拜他喇布勒哈番

達音布他塔喇氏世居札庫木天命三年來歸隸滿洲正白旗任牛象章京從太祖征伐輒爲軍鋒積戰閱授備禦來歸諸部衆或爲蒙古誘遁達音布與楞額禮率兵逐之及於達岱塔擊敗蒙古兵得逃人以歸六年太祖伐明略奉集

堡達音布先驅斬謀克敵進游擊蒙古札魯特貝勒昂安嘗執我使昇葉赫又屢遣兵要我使攘牲畜八年太祖命台吉阿巴泰等將三千人討之達音布時爲噶什布賢噶喇昂邦與雅希禪博爾昔率五十騎先大軍行乘夜渡遼河略昂安所轄厄爾格勒復馳百餘里逼昂安所居寨昂安以牛車載妻子率從者二十餘騎出寨雅希禪博爾昔麾三十餘騎下馬將搏戰達音布引十餘騎勒馬立昂安謀遁不欲戰直前衝騎兵莫突圍出達音布拒戰方彎弓注矢昂安所部乘隙挾短矛搭達音布中其口墮馬我兵衝擊昂安父子及從者盡殪俘其孥達音布遂以創卒師還予卹進世職爲游擊子阿濟格尼堪阿濟格尼堪子宜理布並有傳第三子岱袞屢從征伐授侍衛崇德二年圍錦州戰死贈備禦達音布死最烈子孫貴列爵順治間賜諡乃不及太祖諸偏裨死事者牛彘額眞喀喇以禦劉綎戰死又有牛彘額眞額爾納額黑乙將五百人屯深河與綎戰林中死之甲喇額眞布哈石爾泰牛彘額眞朗格從太祖攻瀋陽旣下明總兵陳策等來援與戰陷陳死瑪爾當圍從太宗圍錦州戰死喀喇額爾納額

黑乙死時太祖方草創未有卹贈布哈贈參將石爾泰朗格贈游擊而瑪爾富圖死時已授游擊朗格子和託瑪爾富圖子烏庫理事太宗喀喇孫舒里渾洛多歡睦古圖事世祖皆有戰功賞延於世朗格棟鄂氏對齊巴顏子阿蘭珠弟也對齊巴顏來歸語見阿蘭珠傳戰死得世職以長子棟世祿襲旗制定隸滿洲廂紅旗和託其次子也崇德七年正月授本旗梅勒額眞從鄭親王濟爾哈朗等伐明圍錦州明總兵祖大壽以其城降遂進克塔山鄭親王籍所俘獲令和託還奏上命分賞軍中死傷將士並令齋敕撫明杏山守將曰汝以善言招之降則已否則以炮攻炮發而彼降亦可許也和託至軍如上指宣示炮發明將降師還得優賚旋追議諸將徇部卒失律和託當罰緩以前勞得免十月從貝勒阿巴泰伐明自界嶺口毀邊牆入至黃崖口軍中議分兩翼夾攻輔國公斐洋古令和託督左翼建雲梯攻城和託周視畢復曰城可登無以梯爲也乃率巴牙喇兵四十人毀城入斬守備一餘悉潰復合右翼圍薊州擊敗明總兵白騰蛟白廣恩遂徇山東克充萊青諸府明年師還授吏部參政兼梅勒額眞



順治元年從入關擊李自成予世職牛象章京上遣侍郎王鰲永招撫山東明副總兵楊威據登州鰲永請兵上命和託與梅勒額真李率泰額孟格帥師討之鰲永至青州爲降將趙應元所戕和託等師至牒巡撫陳錦總兵柯永盛會師逼青州應元復請降和託與李率泰計許之降遣兵夜捕斬應元及其黨數十人宥脅從勿誅青州遂定錦亦下登州上命和託與李率泰移軍河南會豫親王多鐸下江南贊黃金紫貂進世職三等甲喇章京二年從貝勒勒克德渾徇浙江定杭州明將方國安以兵至和託將左翼禦之富陽斬副將二參將二游擊五國安兵大敗復破敵下關直溝燬其木城上命和託與梅勒額真珠瑪喇率所部滿洲蒙古兵駐防杭州三年四月卒雍舜對齊巴顏從子授牛象額真英果戰轍當前鋒累擢鎮紅旗固山額真天聰三年從上伐明圍遵化率本旗兵攻城西南克之四年從取永平授二等參將世職貝勒阿敏棄永平還師雍舜獨贊其議坐罷官奪世職籍沒七年從貝勒岳託舟師攻旅順明將黃龍城守師克之論功先登崖者巴奇蘭薩穆什喀先登城者雍舜珠瑪喇復世職

崇德二年從克皮烏擢梅勒額真四年從征索倫設伏敗敵進一等參將六年從攻錦州戰墜馬得他騎引本旗兵趨左翼及右翼勝乃馳擊爭赴敵坐欺謾論罪命寬之解梅勒額真順治初遇恩詔進二等阿思哈尼哈番復官固山額真卒子庚圖先以功授拜他喇布勒哈番全爲一等阿思哈尼哈番瑪爾圖當札庫塔氏先世居和克通吉太祖時率百餘人授游擊從攻錦州戰死烏庫理年十六卽從征伐太宗命領甲喇額真襲瑪爾圖當世職崇德三年從貝勒岳託伐明略山東明太監馮永盛以兵至擊敗之攻濟南雲梯兵未至烏庫理擊雉堞先登麾所部兵畢上克其城師還將出塞與白奇超哈統將薩穆什喀殿敵不敢逼道經太平寨復步戰敗敵七年從伐明復攻錦州戰於松山敵敗走旋合潰兵屯北山壘甚固烏庫理直前擊之三戰皆捷順治初入關從固山額真葉臣攻太原率十騎繞城周視城兵驟出搏戰烏庫理與甲喇額真薩璧圖奮擊俘馘甚衆尋從英親王阿濟格定陝西湖廣江西諸省師還至池州偵明將黃斐擊之得舟十二還京師授兵部理事官加半個前程三年從肅親王豪

格下四川討張獻忠敗其將高汝礪遂獻忠再破之五年從討叛將姜瓖攻寧武關所署巡撫姜輝總兵劉惟思以三千人赴援內外兵夾擊烏庫理率三旗巴牙喇兵轉戰關下及偏關西河管七戰皆勝師將至左衛瓖兵萬餘陳以待烏庫理擊破之復發砲克其城瓖瓖兵八年進一等阿達哈哈番十年鄭成功寇福建命與理事官額赫理率禁旅及江寧杭州駐防兵濟師至海澄敵以火器守隘烏庫理連破其壘敵毀橋烏庫理躍馬先衆涉敵驚潰師乃畢渡敵又以三千餘人屯海岸烏庫理步戰敗之先後與固山額真金礪等剿敵寨數十降其兵數千人復加拖沙喇哈番十二年授大理寺卿疏言滿洲士卒歲從征討市馬製械皆自具其孥留京師請恩賚行軍所至民多失所雖被旨賑貸當安輯俾自爲生計請勅部議便宜緣旗死事將卒請下所司贈其妻子江廣閩浙濱江海盜賊出沒請敕諸省督撫要隘設重兵西北厄魯特俄羅斯諸部尙阻聲教請敕理藩院議互市條例通貿易所陳凡五事皆下部議行尋命視黃河決口十三年授漕運總督十七年授盛京總管康熙元年改總管爲將軍仍

以命烏庫理是時盛京置戶禮工三部烏庫理請增設刑部廷議如所請四年卒析世職爲二長子俄謨克圖襲三等阿達哈哈番次子佛保襲拜他勒布喇哈番兼拖沙喇哈番喀喇棟鄂氏先世居瓦爾喀當太祖時以其族來歸從征伐有功授牛彘額眞賜號巴圖魯天命四年禦明總兵劉綎力戰被七創以傷卒子扎福尼天聰四年從伐明攻灤州有三卒爲敵所得扎福尼陷陣援之出以功予世職備禦八年十二月從白奇超哈統將巴奇蘭等伐黑龍江加半個前程舒里渾札福尼子也初以巴牙喇壯從軍從攻大凌河城敗蒙古軍及扎福尼卒襲世職順治二年從英親王阿濟格西逐李自成至延安七捷自成走湖廣以師從之次安陸得舟十四三年從豫親王多鐸北討騰吉斯力戰多俘敵擊敗喀爾喀土謝圖汗碩類汗師還授牛彘額眞六年從端重親王博洛西徇大同擊敗姜瓖所署巡撫姜建勳等十一年擢巴牙喇章京十五年授正黃旗滿洲梅勒額眞從信郡王多尼南征雲南戰涼水井敗明將李成蛟戰雙河口敗明將李定國師還進三等阿思哈尼哈番十八年八月卒洛多歡舒

里渾弟從軍取旅順圍錦州皆有功崇德七年從貝勒阿巴泰伐明克順德府先登賜號巴圖魯累進世職至一等哈達番兼拖沙喇哈番崆古圖亦舒里渾弟也順治間從靖南將軍陳泰征福建克興化府先登自巴牙喇壯達擢甲喇額真十七年洛多歡卒襲世職康熙十三年從副都統雅賚阿喀尼等討耿進忠自安慶向江西敗賊小孤山復彭澤宜黃崇仁樂安諸縣十五年移師討吳三桂攻萍鄉敗其將夏國相師下湖南十八年戰楓木嶺敗其將吳國貴復武岡二十四年卒子多博海襲特爾勒舒里渾孫也康熙間從征南大將軍營塔討吳世璠敗其將何繼祖奪石門坎黃草壩乘夜拔嵩明丹城遂克雲南又從都統希福逐馬寶破胡國柱以功予世職拜他勒布喇哈番卒太祖嘗爲故勳臣雅巴海祈天乞轉生朕家又爲布哈孫朗格等八人所曰宥其微失太祖未舉兵以前有族難侍者帕海死之似卽雅巴海布哈孫等事不著

巴篤理世居佟佳以地爲氏天命初與其弟蒙阿圖來歸太祖命編所屬爲二牛泉使兄弟分領其衆隸滿洲正白旗太祖察巴篤理才使爲扎爾固齊積戰

功授游擊十年明發兵航海至旅順繕完故城駐軍以守巴篤理從貝勒莽爾古泰攻之城下盡殲明兵十一年明將毛文龍遣兵夜襲薩爾濟城城兵砲矢交發明兵退結營巴篤理率兵自山而下大呼乘敵敵潰走追斬二百餘級天聰三年從伐明克遵化有功太宗親酌金卮勞之進二等參將四年正月從貝勒濟爾哈朗守永平三月明將張宏謨率兵來侵甲喇額真圖魯什以四十人先巴篤理與噶布什賢噶喇昂邦屯布祿以百人繼伏起屯布祿敗走巴篤理與圖魯什殿力戰其弟謀約馬著矢且踣巴篤理斬敵兵奪馬授其弟冠三十餘人敵乃退五月明兵圍灤州貝勒阿敏守永平不卽赴援城垂破乃遣巴篤理率兵赴之乘夜突圍入城方議並力堅守敵發巨砲焚城樓守將納穆泰等度力不能支棄城依阿敏阿敏亦棄永平東還廷議諸將罪以巴篤理突圍赴援釋勿論五年授禮部承政六年使朝鮮定職貢額數八年八月太宗自將伐明巴篤理從至應州命與貝勒阿巴泰等取靈邱縣王家莊巴篤理督軍攻堡既被創猶奮擊中流矢卒太宗聞之泣下曰此朕舊臣轉戰數十年効命疆場

深可惜也。卹贈三等副將。順治十三年，追諡敏壯子卓羅。自有傳。蒙阿圖，自牛  
象額眞累擢梅勒額眞，坐私立屯莊罷。天聰三年，從伐明，敗敵於遵化，尋命帥  
師伐瓦爾喀，俘其衆三千餘人，師還，上自出郊宴勞，授游擊。世職，擢工部承政。  
崇德三年，以老解職，召見諭之曰：爾等舊臣，朕見之輒心喜，可不時來見也。未  
幾卒。國初，諸將事太祖創業，復佐太宗從征伐而戰死者，勞薩圖魯什功最高。  
巴篤理，穆克譚納爾特與相亞達珠瑚爲俘，所賊順治中，皆追諡。納爾特，事具  
其父雅希禪傳中。穆克譚戴佳氏，世居杭洞，隸哈達。穆克譚從其父兄率衆來  
歸，授牛象額眞。從太祖征伐，戰必陷，陳攻則先登，賜號巴圖魯。有查海胡色者，  
叛太祖，歸哈達。穆克譚從其父兄追之，戰其父兄皆死。從子厄爾諾亦叛歸哈  
達。穆克譚單騎逐斬之，旗制定，隸滿洲鎮藍旗。天命元年，從伐瓦爾喀，戰敗，諸  
將孟庫噶哈皆走，舒賚阿爾虎達將爲敵，得穆克譚與燕布里等八人，衝敵陳，  
援之出師，還太祖譴孟庫噶哈奪所獲，畀穆克譚。六年，從伐明，攻耀州，先登，克  
之，命成焉。蒙古人海色與其衆叛去我師，追之戰不利。穆克譚策馬大呼直前。

刺殺海色餘悉潰以功授二等副將太宗卽位各旗設調遣大臣以穆克譚佐本旗天聰元年四月從伐朝鮮六月阿山阿達海兄弟叛將歸明貝勒阿敏夜帥師追之穆克譚從射阿達海阿達海力戰抽刀斫穆克譚墜馬幾殆卒挾以俱還五年從伐明圍大凌河穆克譚以本旗兵從固山額真宗室篇古當城西南城兵出挑戰圖賴先進穆克譚從之薄濠舍騎步戰將迫敵入壕城上礮矢競發城兵續出奮拒力戰歿於陳太宗惜之曰穆克譚我舊臣不值於此畢命也贈一等副將世襲順治間追諡忠勇立碑墓道子愛音塔穆愛音塔穆襲父爵兼領穆克譚舊轄牛彘益壯丁五十順治初從入關破李自成旋從豫親王多鐸徇河南與梅勒額真沙爾瑚達屢敗賊逐賊至潼關爲殿賊自後來襲三至三卻愛音塔穆功也二年河南旣平從定江南六年八月從鄭親王濟爾哈朗下湖廣時明桂王由榔駐武岡湖南諸郡縣半爲明守愛音塔穆帥師自長沙而南克寶慶擊馬進忠王進才皆有功自成將劉體純與其黨袁宗第等屯洪江爲十寨緣沅江拒守愛音塔穆與尙書阿哈尼堪督軍渡江連破賊寨賊



潰遂與阿哈尼堪駐守沅州十二月賊將王強來犯與阿哈尼堪共擊卻之九年遇恩詔累進二等精奇尼哈番十一月從靖南將軍珠瑪喇略廣東時明將李定國攻新會平南王尙可喜赴援定國有衆四萬列象礮據山峪方相持愛音塔穆等師至合擊大破之遂北二十餘里定國遁去十二年閏五月論功進一等精奇尼哈番康熙十九年卒子公圖襲三十五年從撫遠大將軍費揚古征噶爾丹昭莫多戰勝進三等伯子永泰降襲二等精奇尼哈番乾隆元年改一等子世襲達珠瑚兆佳氏先世居訥殷祖達爾楚國初來歸旗制定隸滿洲正藍旗達珠瑚初任牛叅額眞從太祖伐烏喇斬級四千從克西林屯俘其人以歸追者至還擊敗之斬級五千從伐葉赫斬級三百俘五十人遇明人越境探參斬三十人俘六人敵侵寧古塔出戰斬其將及兵百獲甲百副馬三百匹授三等副將天命十一年伐東海瓦爾喀部又伐卦爾察部皆有功太宗卽位設十六大臣伊遜及達珠瑚佐鑲黃旗天聰元年太宗伐朝鮮克義州留兵駐守命達珠瑚分將之旋復帥師伐瓦爾喀師還爲俘卒所賊八年以其子翁阿

岱襲三等梅勒章京太宗復遣將伐瓦爾喀因誡之曰前遣達珠瑚以疎見害念其從事久有勞方令襲世職汝曹未能如達珠瑚之功儻不自慎欲覬例外恩不可得也順治間追謚襲敏翁阿岱襲職爲甲喇章京從伐虎爾哈加半個前程累遷都察院參政正藍旗梅勒額眞時方攻錦州急命與梅勒額眞多積禮帥師屯成讓逋逃崇德六年從圍錦州與明總督洪承疇戰屢勝尋進攻松山力戰沒於陳賚白金千兩進一等梅勒章京無子以弟之子濟木布襲康熙間降襲一等阿思哈尼哈番乾隆元年改一等男世襲

論曰國之將興必有熊羆之士不二心之臣致身事主蹈死不反顧乃能拓土破敵弼成大業揚古利負大將才略功視額亦都費英東伯仲間勞薩圖魯什驍勇冠軍戰必將選鋒陷陳若拜山三世効忠西喇布達音布巴篤理等以死勤事亦其亞也觀太祖祈天之語惓惓於舊將太宗以達珠瑚爲戒又以恭賚不從令雖陳亡猶付吏議其申軍律惜將材恩威兼盡開國基於是矣



部薩爾濟城長諾米納有兄曰瓜喇忒尼堪外蘭尼堪外蘭譜於明見詰治諾米納及與常書揚書及同部嘉木湖賽長噶哈善哈思虎相爲謀曰與其倚此等人何如附愛新覺羅甯古塔貝勒乎遂相率歸太祖太祖惟牛祭天將與盟常書等言於太祖曰我等率先來歸幸愛如手足母以編氓遇我乃盟旣而諾米納貳於尼堪外蘭常書等請於太祖誘而殺之太祖以同母女弟妻揚書噶哈善哈思虎是歲癸未明年正月太祖從叔龍敦構太祖異母弟薩木占邀噶哈善哈思虎殺諸途太祖聞大怒欲收其骨族昆弟皆與龍敦謀不肯往太祖率近侍數人行太祖族叔稜敦尼之曰同族皆仇汝否則汝女弟之夫何至見殺宜勿往太祖勿聽環甲躍馬登城南橫矚引弓疾馳向城大呼曰有害我者速出聞者憚太祖英武不敢出遂收其骨以歸移置室中解所御冠履衣服以斂厚葬之遂帥師討薩木占及其黨訥申萬濟漢等爲噶哈善哈思虎復仇常書兄弟事太祖分領其故部爲牛衆額眞旗制定隸滿洲鑲黃旗旋改隸鑲白旗常書兄弟皆卒於太祖朝揚書之喪太祖親臨焉常書子布哈圖察哈喇並

爲牛象額眞改隸鎮白旗布哈圖事迹無所表見察哈喇事太宗各旗設調遣大臣察哈喇與焉佐正紅旗天聰三年從上伐明取遵化薊明都四年二月師還命署固山額眞與范文程率蒙古兵守遵化四月與武納格設謀卽樵採地設伏敗敵獲馬二百餘明將合馬步軍四千攻大安口復與武納格整兵奮擊盡殲之五月明兵復灤州貝勒阿敏等謀棄諸城引兵出邊令察哈喇棄遵化會明兵已逼察哈喇與鄂本兌等突圍出全師以還五年五月借總兵官冷格里喀克篤禮伐明南海島師次海濱掠敵舟以渡舟未足駐師待之明兵渡海來擊牛象額眞穆世屯戰死察哈喇督兵力戰別遣人沉其舟敵還求舟不得溺者大半六年五月上伐明略歸化城將渡河與承政車爾格以兵五百爲前鋒具舟濟師十一月及承政巴篤理使朝鮮定職貢歲額九年從貝勒多鐸攻明錦州與固山額眞阿山甲喇額眞吳拜等以兵四百爲前鋒渡大凌河遇明兵三千相向列陳使告多鐸督諸軍繼至明兵潰察哈喇等分道追擊俘敵無算逾年卒布哈圖有子曰葉璽事太宗崇德三年從睿親王多爾袞伐明白青

山口毀邊牆入破薊遼總督吳阿衡軍五年從圍錦州順治元年從武英親王阿濟格西征二年破李自成兵於延安移軍下江南至安陸獲敵艦四復與護軍統領哈甯阿泛江擊賊至富池口水陸屢戰皆捷三年四月蘇尼特部騰機思等叛入喀爾喀葉璽從多鐸等討之追至布爾哈圖山俘七人降二十五戶七月師自圖拉河西行至扎濟市拉克遇喀爾喀土謝圖汗二子率兵二萬禦戰沒於陳葉璽時官巴牙喇甲喇章京事聞贈巴牙喇章京子世職拜他喇布尼哈番布哈圖有孫曰辰布祿初任牛錄額真兼工部理事官崇德二年從多爾袞伐明克陽信順治三年從定西大將軍和洛輝擊賀珍漢中從肅親王豪格討張獻忠皆有功授拜他喇布尼哈番十三年從討鄭成功敗其將陳六御等於舟山進三等阿達哈哈番十七年卒察哈喇有子曰富喇克塔任牛錄額真都察院理事官崇德八年遷工部參政順治元年四月授正藍旗滿洲梅勒額真旋擢本旗蒙古固山額真從睿親王多爾袞入關破李自成追至慶都授牛錄章京世職從豫親王多鐸攻澤關自成將劉宗敏據山爲陳富喇克塔

與都統拜音圖發礮擊之潰二年從下江南與馬喇希等爲前鋒克揚州三年從貝勒博洛定浙江克處州略福建與都統漢岱克分水關趨泉州下撫州及所領縣三加半個前程五年二月坐事解固山額眞尋從征南大將軍譚泰討金聲桓敗賊於九江得戰艦百餘與何洛會以偏師截饗道得糧艘二百遂攻南昌聲桓及王得仁以兵七萬守隆富喇克塔以舟二十爲前鋒薄城力戰明年賊平師還卒於軍進一等阿達哈哈番揚書有子曰達爾漢太祖甥也改隸鑲藍旗初爲牛彘額眞太祖妻以女爲額駙積戰功授一等副將世職太宗卽位列八大臣領鑲黃旗從大貝勒代善伐扎魯特部單騎逐敵獲其台吉復伐棟揆部俘塔布囊古穆楚赫爾杜喀爾代青多爾濟三人及其子進三等總兵官天聰元年從伐朝鮮克義定安三州斬其府尹李莞等朝鮮國王李倬請行成使與納穆泰等莅盟師還上賜宴勞之復從伐明攻錦州有功貝勒阿巴泰以賜宴不得與大貝勒同坐屬達爾漢代表奏上使勸諭之復宴阿巴泰又以爲言乃解達爾漢固山額眞示意旋命復任三年從伐明圍遵化率所部攻城西

迺北克之四年蒙古敖漢忒曼諸部兵攻昌黎不克命達爾漢與喀克篤禮等以兵千人往會攻城未下焚近郭廬舍而還五年七月從伐明圍大凌河城率所部攻城北迺東濠濠築壘與冷格里等環城固守八月城人以步騎五百出戰達爾漢率八十人擊敗之越日敵復出挑戰達爾漢督所部邀擊明兵墮壕死者百餘人六年從伐察哈爾師次哈納崖達爾漢從者盜馬遁入察哈爾告師至林丹汗舉部西奔驅歸化城富家渡黃河西遁達爾漢坐降一等副將七年明將孔有德來降達爾漢與篇古屯兵江岸守其舟八年復從伐察哈爾遂略明邊自上方堡毀邊牆入經朔州分兵至宣府右衛是歲命免功臣徭役達爾漢與焉並增牛象人戶九年上遣諸貝勒伐明略山西命達爾漢及阿山等出屯牽制明寧錦諸道兵使不得西援道遇敵擊敗之斬明將劉應選崇德元年五月從武英郡王阿濟格伐明攻順義以所部先登進一等總兵官尋以順義復失論罰六年從鄭親王濟爾哈朗等伐明攻錦州達爾漢坐濟爾哈朗召議禦敵不時至嗾其僚爭功能固山額真奪世職順治元年卒達爾漢有子曰



鄂羅塞臣事太宗官甲喇章京領擺牙喇兵三年從伐明薄燕京與哈齊阿共破明經略袁崇煥營太宗嘉其善戰授備禦四年署固山額真從貝勒阿巴泰等守永平明兵自開平衛至迎擊敗之五年從伐明圍大凌河城屢敗城兵八年從貝勒薩哈廉略山西明兵自崞縣至鄂羅塞臣從第三隊先衆擊敵累功進二等阿達哈哈番崇德元年從伐朝鮮與薩穆什喀等敗其援兵二年授議政大臣三年十月從豫親王多鐸伐明侵寧遠錦州十一月豫親王至中後所將與鄭親王濟爾哈朗軍會明總兵祖大壽兵來襲甲喇額真翁克等及從征土默特部兵先奔鄂羅塞臣及哈齊阿等且戰且進士卒有死傷者論劄奪世職六年三月從睿親王多爾袞伐明圍錦州六月復從鄭親王濟爾哈朗伐明圍錦州祖大壽以步兵出戰左翼三旗騎兵避敵勿敢擊鄂羅塞臣與同官阿桑喜率擺牙喇兵直前奮擊大壽乃引去肅親王豪格庇三旗之未戰者睿親王多爾袞和之使誠鄂羅塞臣母言戰勝皆出擺牙喇兵亦母言戰時未見騎兵功罪置勿論明年事聞上令多爾袞出白金五百豪格出白金千畀鄂羅塞

臣進二等阿達哈哈番梅勒額眞八年與參政巴都禮等定黑龍江順治二  
年從討李自成克潼關鄂羅塞臣先登五年正月命帥師駐滄州十二月從武  
英親王阿濟格討姜瓖六年七月擢正藍旗蒙古固山額眞尋兼任刑部侍郎  
鄂羅塞臣公主子世臣從征伐有功兩遇恩詔累進二等精奇尼哈番七年坐  
獄獄徇情罷侍郎八年授都察院左都御史尋命專任固山十六年與安南將  
軍明安達禮帥師駐荊州鄭成功犯江甯明安達禮鄂羅塞臣以舟師赴援成  
功敗走十七年還京仍任都統康熙三年卒贈太子太保諡敏果子勳貝自有  
傳

康果禮先世居那木都魯以地爲氏歲庚戌太祖命額亦都將千人徇東海濕  
集部降那木多魯綏芬甯古塔尼馬察四路康果禮時爲綏芬路屯長與其弟  
喀克都里及他屯長明安圖巴顏泰松阿伊勒占蘇爾休明安圖巴顏子哈哈  
納綽和諾泰松阿子葉克書等凡十九輩率丁壯千餘來歸太祖爲設宴賚以  
金幣分其衆爲六牛彖以康果禮喀克都里伊勒占蘇爾休哈哈納綽和諾世

領牛象額真旋授康果禮三等總兵官以貝勒穆爾哈齊女妻之號和碩額駙  
旗制定隸滿洲正白旗天命三年從上伐明取撫順克撫安三岔等十一堡入  
鴉鶻關破清河六年復從伐明下瀋陽樹雲梯先登遂克其城太宗卽位列十  
六大臣佐正白旗尋擢擺牙喇章京天聰元年從貝勒阿敏伐朝鮮三年從  
上伐明入洪山口克遵化薄明都上駐軍德勝門外明督師袁崇煥入援壁於  
城東南上命康果禮從諸貝勒擊之諸貝勒逐敵迫濠康果禮與甲喇章京耶  
球漢岱等不及濠而返並坐削爵罰鍰奪俘獲五年卒子六色虎德繼爲牛象  
額真適色爲擺牙喇甲喇章京從伐明戰塔山沒於陳賴塔自有傳喀克都里  
與康果里同隸滿洲正白旗初授三等總兵官太宗卽位列八大臣領正白旗  
天聰元年從伐朝鮮有功三年上伐明圍遵化入固山環城而攻分隅列陳喀  
克都里所部兵薩木哈圖樹雲梯先登衆繼之城遂拔上嘉喀克都里造攻具  
如法督兵先諸軍登城親酌金卮獎勞進二等總兵官賜號噶思哈巴圖魯言  
其勇敢善戰疾如飛鳥也薩木哈圖亦賜巴圖魯號授備禦世職四年正月上

復伐明克永平明兵潰走昌黎上遣敖漢奈曼巴林扎魯特諸部兵攻之命喀克都里與固山額真達爾漢等將千人繼往爲助守堅不能下焚附城廬舍引還上既錄遵化功察薩木哈圖猛士心愛惜之戒喀克都里毋使更先登及攻昌黎薩木哈圖運木築柵復樹雲梯欲登聞上命罷攻乃止上以喀克都里不恤戰士深詰責之五年五月與固山額真冷格里分率左右翼步騎兵伐明規取南海島徵舟於朝鮮不至師次海濱不能渡引還明兵邀戰屢擊敗之多所俘獲八月上復伐明圍大凌河城喀克都里率所部軍城東北城人食盡祖大壽以城降引還六年從上伐察哈爾與諸將分道並入籍所俘人戶及帛馬牛羊以獻賜賚有差七年上詢諸貝勒大臣伐明及朝鮮察哈爾宜何先喀克都里言宜先伐明以承天佑協人情且利在神速攻其不備上嘉納之八年喀克都里家人許喀克都里將亡歸瓦爾喀以財貨藏那木都魯故屯上曰喀克都里安有此果欲負朕天必鑒之以許者付喀克都里殺之逾數月喀克都里卒其兄康果禮妻故貝勒舒爾哈齊女言喀克都里謀亡去事不誣諸子坐此不

得紹封哈納亦那木都魯氏明安圖巴顏子也隸滿洲鎮紅旗初與伊勒占蘇爾休同授備禦太祖妻以宗女尋從伐烏喇被數創力戰敗敵上命將所部出駐賽明吉未至其戍兵叛亡守將瑪爾圖追弗及哈納聞之兼程疾進斬三百餘級收男婦五百餘以還上賜以所得叛渠及鞍馬弓矢天命四年三月明經略楊鎬部諸將四路來攻上督諸貝勒出禦破之遂進克開原鐵嶺哈納皆在軍有功六年從攻遼陽與博爾晉同敵城下敗其援兵復分攻沙嶺城破援兵自廣寧至者太宗卽位設各旗調遣大臣以哈納佐鎮紅旗天聰八年帥師略錦州進攻寧遠明兵驟至哈納馬殫徒步益奮擊卒破明兵城海州明兵來爭哈納以所部首當敵敵潰走復授耀州解其圍遂敵獲馬三十崇德元年從武英郡王阿濟格伐明入長城克昌平涿州創發病廢致仕尋卒子費揚古事聖祖以佐領從軍討吳三桂師次荊州戰宜昌戰永興皆捷攻常寧耒陽先驅累遷鎮紅旗漢軍副都統卒綽和諾亦隸鎮紅旗其初歸太祖別率所部百人僭太祖寶子甚厚從太祖征伐臨陳衷綿甲奮起直前所向披靡

歲辛亥從何和禮伐呼爾哈部克扎庫塔城天命四年擊明總兵馬林尙間崖六年取瀋陽遼陽並有功授游擊帥師戍科木索密古塔有就善者戕守吏率衆掠輜重亡去綽和諾追及海濱斬就善並殲其黨上命以所獲輜重犒之太宗卽位列十六大臣佐鑲紅旗天聰五年從上伐明圍大凌河城明監軍道張春總兵吳襄等率兵萬餘自錦州來援綽和諾先衆迎擊力戰沒於陳上厚恤其家進世職一等參將無子其兄翁格尼襲以新附呼爾哈百人益所轄牛衆旋以翁格尼才不勝改授其子富喀禪富喀禪初以擺牙喇壯達事太宗大凌河之役深入敵陳綽和諾戰死富喀禪亦被創墮馬裏創步戰奪敵纒擺牙喇壯達瑤奎亦墮馬富喀禪復前援與俱歸八年攻大同復被創仍奮進克敵寨是歲代其父爲牛衆領眞襲職崇德元年從伐朝鮮三年授工部理事官兼甲喇章京從豫親王多鐸伐明攻甯遠敗敵中後所城西順治初從入關擊李自成加半個前程三年授西安駐防總管自成餘黨劉文炳郭君鎮等掠延安慶陽四年三月富喀禪帥師討之逐賊三水斬君鎮別遣游擊胡來覲守備徐國

崇等逐文炳至宜君藍莊溝獲之俘斬其黨略盡五年回民米喇印丁國棟等陷河州爲亂富喀禪與總督孟喬芳遣兵攻討諸回皆受撫而喇印復叛陷甘州富喀禪帥師進攻深溝高壘相持賊出城來犯戰輒勝並殲其樵採者城既下敵喇印國棟又與纒回土倫泰等陷肅州遣副將馬塞張勇討平之六年姜瓖以大同叛旁近郡縣皆陷富喀禪遣諸將根特都敏赴援戰猗氏獲瓖所署監軍道衛登方戰合水斬瓖將劉宏才論功遇恩詔累進一等阿思哈尼哈番聖祖卽位改西安駐防總管爲將軍富喀禪任事如故時自成餘黨李來亨郝搖旗袁宗第等屯歸州興山間康熙二年上遣將往討命富喀禪與總督李國英副都統杜敏等會師戰於陳家坡賊潰遁進至黃草坡復大敗之進三等精奇尼哈番五年卒子穆成額自有傳葉克書輝和氏尼瑪察部長泰松阿子也歸太祖授牛錄額眞隸滿洲正紅旗天命六年從伐明攻遼陽敵背城而陳葉克書衝鋒突擊攻沙嶺先衆殺敵累功授三等副將太宗卽位列十六大臣佐正紅旗天聰五年授兵部承政六年授固山額眞八年八月從貝勒代善伐明

入得勝堡略大同下諸城堡西至黃河合軍朔州十一月考滿進二等副將世職九年貝勒多爾袞伐明白大同入邊分兵授葉克書從貝勒多鐸屯甯遠錦州間綴明援師斬明將劉應選俘其偏裨崇德元年從武英郡王阿濟格伐明白延慶入邊克十二城師還坐所部失伍及攘獲擅殺諸罪罷官削世職仍領牛菜二年正月太宗伐朝鮮命從承政尼堪等帥師伐瓦爾喀師出會甯擊敗朝鮮兵十一月從參政星納伐卦爾察至黑龍江俘獲甚衆三年師還上特遣大臣迎勞尋授兵部右參政四年七月授梅勒額眞十一月從承政索海等帥師伐索倫五年四月復任固山額眞七月授牛菜章京世職復從睿親王多爾袞伐明圍錦州與固山額眞圖爾格率所部三百人爲伏城西南烏欣河捕城人出牧者敵兵千餘逆戰葉克書馬中矢蹶圖爾格馳救之上馬復戰殺敵比還敵潛踞其後葉克書收兵還擊敵潰以功進三等甲喇章京六年九月從貝勒杜度伐明圍錦州與固山額眞譚泰阿山等鑿壕環守擊明總督洪承疇於松山十一月從貝勒阿巴泰等伐明師至黃崖口葉克書與譚泰定策分兩道



夾擊入邊薄長城麾軍先登攻薊州收明總兵白騰蛟白廣恩諸軍尋遣兵攻孟家臺陷敵坐罷官奪世職順治元年三月世祖復命爲梅勒額眞帥師駐甯遠四月率步兵從入關擊李自成身被三十一創毀一目戰彌厲大破賊軍二年從肅親王豪格略山東賊渠十餘輩據滿家洞悉險爲巢凡二百五十一窟葉克書與尙書車爾格合兵搜剿殲其渠悉堙諸窟以功累進二等阿達哈哈番三年授鎮守盛京總管恩詔進三等阿思哈尼哈番十四年坐昭陵總管鍾柰有罪失不効罷官奪世職十五年卒子道喇道喇以擺牙喇兵從征伐積功至擺牙喇甲喇章京崇德三年從伐明五年圍錦州戰松山杏山皆有功順治元年調噶布什賢甲喇章京睿親王多爾袞與李自成戰於一片石從噶喇昂邦鄂碩當自成將唐通通大敗入關逐賊戰安肅慶都乘勝躡擊斬馘甚衆尋從固山額眞葉臣略山西至汾州敗自成將白輝授牛錄章京世職三年從順承郡王勒克德渾攻荊州擊走李錦五年從大將軍譚泰下江西討金聲桓五敗賊獲所署總兵以下九年擢正紅旗梅勒額眞十年從靖南將軍哈哈木復

潮州討郝尙久旋帥師駐荊州十四年授本旗蒙古固山額真十六年從信郡王多尼平雲南攻元江土司克其城累功並遇恩詔進一等阿達哈哈番康熙初以老乞致仕徙居盛京十二年聖祖加恩諸老臣加太子少傅二十一年幸盛京召見賜坐侍茶酒優賚二十二年九月卒年八十一諡勤襄以弟之孫伊濟納襲職葉克書次子夏穆善第三子瑚葉皆有戰功授世職夏穆善二等阿達哈哈番瑚葉三等阿達哈哈番

博爾晉世居完顏以地爲氏太祖初起兵有挾丁口來歸者籍爲牛錄卽使爲牛錄額真領其衆順治間定官名皆漢語謂之世管佐領博爾晉領牛錄隸滿洲鑲紅旗尋授侍衛歲癸巳太祖侵哈達略富爾佳齊寨博爾晉與族弟西喇布從西喇布被二矢死博爾晉拔其矢還射殪發矢者西忒庫爲西喇布報仇天命六年授扎爾固齊城薩爾濟命博爾晉董其役役竟從伐明攻瀋陽擊敗明總兵賀世賢陳策瀋陽下進攻遼陽明總兵李懷信侯世祿蔡國柱姜弼董仲葵合軍五萬屯城東南五里左翼四旗與戰大破之城兵自西門出援博爾

晉方奉命調敵傍城行遂合兩紅旗兵邀擊明兵敗入城爭門相蹂踐死者枕籍會左翼四旗兵已登陴博爾晉麾衆畢登遼陽亦下復分兵拔沙嶺擊敗明廣甯援軍八年與達音布雅希禪帥師伐扎魯特部其貝勒昂安突走達音布戰死博爾晉與雅希禪奮進斬昂安俘其孥師還上優賚之十年擢梅勒額眞將兵二千伐東海虎爾哈部收五百戶以歸上郊迎宴勞太宗卽位列八大臣領鑲紅旗兼侍衛如故天聰元年正月從伐朝鮮五月上自將圍錦州屯城西二里博爾晉自濟陽帥師至敗明兵追至寧遠城下盡殲之敍先後戰功授一等副將旋卒以失敕書子孫不得襲康熙三年其子特錦疏請立碑紀績部議無左證持不可聖祖以博爾晉事太祖勤勞夙著特詔許之並追諡忠直特錦及博爾晉孫瑪沁曾孫康喀喇皆有戰績特錦博爾晉第四子也初任牛叅額眞天聰八年授牛叅章京世職崇德五年從鄭親王濟爾哈朗帥師屯田義州蒙古多羅特部蘇班代等降明居杏山西五里台使通款上命鄭親王移師迎護明總兵祖大壽吳三桂劉周智屯杏山拒戰特錦以偏師擊敗之六年從伐

明圍松山攻寧遠皆力戰敗敵順治初從入關遂李自成至慶都與梅勒額眞和託合軍大敗之進三等甲喇章京任兵部理事官考滿進二等甲喇章京三年從肅親王豪格下四川討張獻忠戰三水敗其將胡敬德復戰禮縣敗其將高汝礪獻忠死西充餘賊負山將斷我兵後特錦擊之走又戰馬湖破其將楊正六年從討姜瓖略壽陽賊犯兩藍旗分地徇汾州賊七千夜擊兩紅旗軍壘特錦連擊敗之平遼遼州榆社以次悉平七年擢兵部侍郎兼鑲紅旗蒙古梅勒額眞進三等阿思哈尼哈番十二年擢本旗蒙古固山額眞議政大臣十五年從信郡王多尼征貴州雲南進二等十八年轉本旗滿洲都統康熙十一年卒諡襄壯瑪沁博爾晉孫父本託輝博爾晉長子官牛象額眞兼都察院理事官崇德三年以擺牙喇甲喇章京從貝勒岳託伐明自稽子嶺入邊明薊遼總督吳阿衡以馬步兵六千來援瑪沁與勞薩等率兵擊敗之獲其馬及砲六年從圍錦州敗敵於松山順治初從入關破流賊授牛象章京世職五年擢鎮紅旗蒙古副統都七年恩詔加半個前程尋從鄭親王濟爾哈朗征湖廣至衡州

疾卒無子以兄子康喀喇襲康喀喇博爾晉曾孫初爲二等侍衛順治四年蘇尼特部騰機思與其弟騰機特叛康喀喇從豫親王多鐸帥師往討大破之陳斬騰機特進二等阿達哈哈番十五年從睿南大將軍洛託征貴州康熙十年遷護軍參領十二年吳三桂反順承郡王勒爾錦帥師討之康喀喇將護軍從十三年攻岳州戰荊河口戰城陵磯破三桂將吳應麒十六年攻長沙復茶陵戰攸縣破三桂將王輝十七年取柔陽下常寧新寧諸縣又克郴州康喀喇皆在行間二十五年授鎮紅旗滿洲副都統二十九年從裕親王福全征噶爾丹三十年卒

雅希禪先世居馬佳以地爲氏父尼瑪禪當太祖兵初起從其兄赫東額率五十餘戶來歸任牛彖額眞雅希禪事太祖積戰功授備禦爲扎爾固齊天命四年蒙古喀爾喀五部遣使請盟太祖命額克星格綽護爾雅希禪庫爾纏希福往莅是歲從上禦明師戰於界凡雅希禪先衆克敵復擊明總兵馬林於尙間嚴破其中堅以功進二等參將七年從上克遼陽進三等副將及沙嶺之戰爲

敵所創戰敗降一等參將八年從貝勒阿巴泰等伐札魯特部與達音布博爾  
晉率兵逼貝勒昂安賽昂安以其孥行達音布戰死雅希禪與博爾晉共擊殺  
昂安尋卒順治十二年世祖追錄太祖太宗諸將賜諡勒碑雅希禪諡敏果子  
三恭袞訥爾特拉篤渾恭袞襲職坐事析世職爲二備禦與其弟訥爾特分襲  
崇德三年授刑部副理事官四年從伐索倫陳沒部議恭袞不從軍令乃爲敵  
所狀當奪世職籍家產三之一上念其父雅希禪有功特贖之訥爾特初從太  
宗伐明敗敵小凌河復自大同入邊選善射者使訥爾特將之攻克小石城既  
襲備禦復從圍錦州屢敗敵松山杏山崇德七年授刑部參政兼梅勒額眞師  
方攻松山松山明兵夜遁訥爾特與擺牙喇繼章京鰲拜馳塔山南海濱先敵  
至辟食以待夜擊明兵達旦明兵據山巔訥爾特率所部冒矢石攻明兵敗  
走乘勝逐之明兵入水死者甚衆八年從伐明初入邊擊敗明守將師度渾河  
方築梁明兵千餘起撓之訥爾特擊之走復敗明援兵於三河進略山東克武  
定師還將出邊明將以步兵追躡謀劫砲訥爾特與固山額眞準塔還擊破之

賜白金五百九月復從鄭親王濟爾哈朗伐明攻甯遠明總兵吳三桂出拒訥爾特力戰陳沒贈游擊拉篤渾從父兄在軍戰比有功恭袞戰死襲備禦崇德六年從伐明圍錦州陳沒加半個前程舒賽世居薩克達以地爲氏歸太祖隸滿洲鎮藍旗天命四年從太祖禦明師與雅希禪等攻馬林於尙間巖以功授備禦尋從伐瓦爾喀俘獲甚衆進二等參將太宗即位列十六大臣佐鎮藍旗天聰元年從伐朝鮮師還命與固山額眞阿山等帥師戍義州八年上自將伐明鄭親王濟爾哈朗居守舒賽與梅勒額眞蒙阿圖等副之舒賽善戰攻城輒被棉甲先登太祖嘉其勇又慮其輕進溫諭誠止之舒賽益感奮先後克十六城太宗特敕旌其功進三等梅勒章京崇德六年十月卒順治十二年追設壯敏子西蘭初任牛象章京授備禦世職順治元年以擺牙喇甲喇章京從豫親王多鐸討李自成攻潼關三戰皆勝二年從貝勒博洛定江南下松江徇福建克平和論功遇恩詔進三等阿達哈哈番七年卒西蘭子席特庫崇德六年襲大父舒賽世職三等梅勒章京八年授甲喇額眞從伐明攻前屯衛以砲克城

新明總兵李輔明順治初從入關進略山西佐固山額真葉臣等克太原二年從英親王阿濟格徇陝西敗賊延安自成走湖廣繼擊至安陸與隨拜等屢破敵進二等梅勒章京四年改二等阿思哈尼哈番五年四月卒乾隆間定封二等男景固勒岱扎庫塔氏初居呼爾哈部烏喇招之不往太祖遣將伐東海渥集部景固勒岱徒步從軍攻取烏爾固辰路俘敵甚衆尋擊孛及諸兄弟率所屬三十戶來歸隸滿洲正白旗任牛象額真天命三年從上伐明入鴉鵲關攻克河城擢甲喇額真仍兼領牛象上規取遼瀋景固勒岱並在軍有功天聰八年五月授世職二甲等喇章京十二月命與甲喇額真吳巴海率兵四千伐瓦爾喀部降其屯長芬達里及所屬五百餘戶俘阿庫里尼滿部千餘人獲貂虎狐貉舍利獾獺青鼠諸毛毳之屬九年六月師還上令禮部諸臣宴勞以所獲分賞將士進世職一等甲喇章京崇德二年從武英郡王阿濟格攻明皮島克之賚裘服鞍馬銀布駝牛諸物順治初恩詔累進二等阿思哈尼哈番十一年八月卒諡忠直從弟崇阿任牛象額真天聰八年從伐明徇大同略回雁堡崇



德元年從伐朝鮮敗敵桃山村六年從伐明圍錦州入其郭巷戰七年從伐明敗敵渾河之濱入山東至壽光順治初從入關二年從下浙江拔湖州進取福建敗敵福甯五年從討金聲桓敗王得仁於南昌從討李成棟破其軍六年戰南康圍信豐暨成棟赴水死累功遇恩詔進一等阿達哈哈番十八年卒

揚善瓜爾佳氏費英東弟音達戶齊之子也費英東諸弟音達戶齊吳爾漢郎格衛齊皆事太祖隸鑲黃旗而音達戶齊諸子揚善伊遜鍾金吉賽納都祜吉遜改隸鑲白旗揚善亦速事太祖授備禦太宗卽位旗設調遣大臣二揚善佐鑲黃旗尋授巴牙喇章京三年從伐明受上方略衝鋒攻堅所至有功五年攻大凌河與明監軍道張春戰冒矢石陷陳胸腕皆被創進游擊擢內大臣六年從伐察哈爾林丹汗既遁其部衆有遁入明境沙河堡者使揚善齎書索以歸崇德二年略大同蒙古有被掠者悉取以還授議政大臣順治初肅親王豪格得罪都統何洛會誣告揚善及其子羅碩諂附豪格爲亂羅碩能通滿漢蒙古文字太宗召直文館授內國史院學士噶布什賢章京兼刑部理事官至是

父子俱棄市世祖親政誅何洛會復揚善世職以其孫霍羅襲伊遜音達戶齊第三子太宗卽位列十六大臣佐鑲黃旗天聰三年從伐明攻遵化伊遜先登中砲傷臂太宗親臨視授游擊尋遷兵部承政七年偕英俄爾岱使朝鮮定互市約崇德二年坐事罷三年復爲兵部承政四年命與工部承政薩穆什喀等伐虎爾哈部分兵循喇里闌下兀庫爾城設伏鐸陳城敗敵斬七十級師還坐爲博穆博果爾所襲亡輜重士卒論罰八年卒順治十二年追設襄壯建碑紀績子噶達渾係沙爾布相繼襲職納都祜音達戶齊第八子順治初任護軍參領從入關破李自成克潼關定西安移師下江南追明福王至蕪湖並有俘獻授半個前程三年從討騰機思土謝圖汗碩羅汗拒戰皆擊敗之五年從討金聲桓有功八年擢正白旗梅勒領眞改副都御史進拜他喇布喇哈番又以伊遜無嗣納都祜當併襲復遇恩詔覈改一等阿思哈尼哈番兼拖沙喇哈番十四年都察院請更定世職襲次上疑其徇私坐罷官十七年卒無子以鍾金孫貴欽吉賽子盧柏林分襲武賴吳爾漢子也隸滿洲鎮黃旗天聰四年與布爾

堪等將精兵百人略明邊渡大凌河馳斬俘獲甚衆八年任甲喇額真九年擢  
固山額真領正藍旗崇德元年七月從武英郡王阿濟格伐明遵化三屯營  
守備率衆來窺伺盡殲之師還坐出邊不收後隊誑言阿濟格逼脅臨陳敗走  
割白金四百十二月上自將伐朝鮮武賴從與豫親王多鐸共擊敗諸道援兵  
復與固山額真譚泰等率阿禮哈超哈兵攻漢城樹雲梯以登守陴者奔竄盡  
收其輜重牲畜以歸三年從貝勒岳託伐明至山東擊敗明內官馮永盛總兵  
侯永祿等經董家口敵兵千餘依山爲陳武賴與戰屢捷犁其壘明將復率兵  
要我軍輜重武賴與準塔擊破之遂乘勝行略地以功授牛象章京五年從睿  
親王多爾袞伐明刈禾錦州明兵出拒武賴追擊迫使入城遂略松山八年從  
貝勒阿巴泰伐明至渾河擊敗明兵師還經密雲明兵以火器斷歸路武賴與  
固山額真繁拜奮勇馳突明兵潰走度塞復敗敵整軍出邊以功加半個前程  
順治初入關破李自成三詔進至一等阿思哈尼哈番以老乞休尋卒諡康毅  
建碑紀績衛齊子繁拜郎格孫席卜臣皆別有傳

冷格里舒穆祿氏滿洲正黃旗人揚古利弟也少事太祖從征伐叙功自備禦累進一等副將明將毛文龍分兵自朝鮮義州城西渡鴨綠江入海島中闢田以耕天命九年秋八月上命冷格里將左翼兵吳善將右翼兵襲擊之道得謀知明兵晝渡江穫於島夜還屯江岸冷格里夜引兵自山蹊潛行平旦度明兵已渡江卽疾馳揭支流以濟入島明將卒皆驚奔潰追斬五百餘級餘衆爭舟多墮水死焚島中積聚而還太宗卽位以其弟納穆泰爲八大臣領本旗而冷格里列十六大臣佐之蒙古扎魯特部貳於明大貝勒代善等帥師討之冷格里及甲喇額真阿山將六百人爲前鋒喀爾喀巴林部遂守卒縱火燎原張軍勢轉戰而前獲扎魯特部貝勒巴克等十四人俘二百七十一掠駝馬牛羊三千九百四十有二師還上率諸貝勒大臣迎勞進三等總兵官天聰元年從貝勒阿敏等伐朝鮮夜引兵八十人襲明邊一夕入六墩盡俘其墩卒遂襲義州克之論功進一等總兵官三年二月明兵自海島移屯朝鮮鐵山冷格里率精兵攻之多所斬馘九月從揚古利率兵逐逃人雅爾古遇毛文龍部卒以採

獲至者俘數十人以還四年納穆泰以棄灤州勦擒冷格里爲八大臣領本族五年五月與喀克篤禮分將左右翼兵伐南海島有功八月太宗伐明冷格里從圍大凌河城冷格里以所部軍於城西北上招明總兵祖大壽降大壽未決先使裨將韓棟出謁出冷格里所守門冷格里令軍士戎服執戟立營門內外示棟軍容棟既謁上還將入城冷格里呵使止門外問姓名審形貌然後令入棟具以語大壽大壽怵我軍嚴整乃決降七年六月從貝勒岳託等將右翼兵伐明取旅順師還上迎勞如初是年冬冷格里有疾十二月上親至其第視疾八年正月卒上臨其喪哭之慟駕還設輓於丹墀坐而歎息漏下二鼓始入宮明年上行幸道經其墓下馬酹而哭之順治十二年追諡武襄子穆成格天聰四年從伐明克永平四城薄明都明侍郎劉之綸率兵出禦戰敗所將兵盡殲之綸匿石巖下穆成格射殺之八年襲一等總兵官尋改一等昂邦章京官至刑部左參政卒子穆赫林襲順治初改一等精奇尼哈番恩詔累進一等伯康熙中其孫吉當阿襲復爲一等精奇尼哈番乾隆間定封一等子納穆泰揚古

利幼弟其母襁負來歸者也少從太祖征伐太宗即位擢爲八大臣領本旗以篤義貝勒巴雅喇子拜音圖及其兄冷格里爲十六大臣佐之天聰元年從伐朝鮮三年冬從伐明攻遵化率所部軍其城西北四年春復克永平降遼安下灤州是爲永平四城師還命貝勒阿敏督諸將戍守納穆泰與圖爾格庫爾纏高鴻中率正黃正紅鑲白三旗分守灤州明經略孫承宗銳意復四城四月遣兵攻灤州不能克而退五月監軍道張春監紀官邱禾嘉總兵祖大壽馮世龍楊紹基副將祖大樂祖可法張宏謨劉天祿曹慕誠孟弋悉衆來攻納穆泰與圖爾格分門而守矢石競發出精銳繞城搏戰驅敵出境外敵復突至攻納穆泰所守門焚城樓或執蠶緣雲梯先登我兵阿玉什斬之奪其蠶敵稍卻求援於阿敏阿敏守永平使巴篤禮以數百人往夜突圍入城敵以砲攻我兵不能禦守四日夜棄城奔永平就阿敏阿敏旋引師還永平四城復入於明納穆泰坐論死上宥之奪官籍其家五年將兵入明邊遂通斬六人執九人以歸明寧遠人張士粹來降詭言明築大凌河城使納穆泰與圖爾格將千人往謁之

還言士粹等言妄悉誅之尋擢兵部承政授游擊世職復與圖爾格略錦州松山八年改官制授固山額真三等甲喇章京秋從上伐明自上方堡入八月克靈邱縣王家莊先登有功九年二月命貝勒多爾袞將萬人收察哈爾林丹汗子額爾克孔果爾額哲納穆泰將右翼圖爾格將左翼師還入明境自平魯衛略代州至崞縣出邊納穆泰圖爾格以兵千人殿明總兵祖大壽率馬步兵三千人追至圖爾格奮擊破之潰兵合馬步五百餘據嶺爲陳納穆泰麾兵圍攻盡殲其衆獲人畜七萬六千二百叙功加三等梅勒章京十月卒上欲臨其喪諸貝勒諫止賜御服以斂順治四年改世職三等阿思哈尼哈番三傳降襲揚古利從弟譚泰自有傳譚泰弟譚布天聰初爲巴牙喇甲喇章京五年從伐明圍大凌河城城人出樵採率先邀擊斬三人俘二人復與希福等擊敗明援兵自錦州至者崇德三年授議政大臣四年十一月與薩木什哈索海等伐索倫部取道虎爾哈部攻雅克薩城得丁壯三百餘索倫部長博穆博果爾迎戰擊卻之護所俘以歸授牛象章京賜貂皮及人戶五年擢十六大臣時我兵屯田

義州譚布及覺善率兵爲衛明兵驟至殘屯丁論罰如例六年伐明圍錦州明  
總兵祖大壽以步卒出戰譚布衝堅力戰復敗其騎卒斬材官一以徇明總督  
洪承疇來援譚布從其兄譚泰迎戰敵騎至譚布屢奮戰挫敵以功加半個前  
程祖大壽既降上命諸大臣與較射賞諸中侯者譚布賜駝一八年正月復與  
覺善戍錦州九月從鄭親王濟爾哈朗伐明略寧遠順治元年從入關擊李自  
成追至慶都進二等甲喇章京二年從饒餘郡王阿巴泰鎮山東與準塔徇徐  
州擊敗明軍得舟五百餘砲五十有七時豫親王多鐸下江南自泗州渡河趨  
揚州而明總兵劉澤清總漕田仰猶保淮安譚布與準塔師至清江浦澤清仰  
皆走遂定淮安下如皋通州撫輯附近諸州縣進一等甲喇章京加半個前程  
三年從肅親王豪格擊張獻忠六年從端重親王博洛討姜瓖圍大同瓖潛結  
援賊倚北山綴我軍而自糾衆出城爲夾擊譚布與熬拜車爾布等先破賊援  
還擊瓖迫使入城斬釐甚衆又分兵徇太原平陽汾州論功遇恩詔累進一等  
阿思哈尼哈番八年三月授工部尙書是年八月譚泰誅詔兄弟毋連坐尋罷



尙書復爲三等阿思哈尼哈番康熙四年卒

薩穆什喀修佳氏扈爾漢第三弟也隸滿洲正白旗少從太祖轉戰積功授游擊嘗以十二人逐敵山籠斬百人獲五十三人馬牛羊千計太宗即位列十六大臣佐鑲白旗天聰四年從伐明攻溧州七年復從貝勒岳託等伐明規取旅順時師自陸行皆乘馬薩穆什喀曰師潛進安用乘馬爲乃率衆舍馬徒行至水次岳託勉薩穆什喀努力薩穆什喀對曰如貝勒言此城誓必下不空歸也遂與白奇超哈章京巴奇蘭以舟先身被百創戰益厲遂破旅順帥還太宗郊勞親酌金卮以賜進一等參將八年授甲喇額眞從貝勒杜蘭戍海州十二月命副巴奇蘭伐黑龍江虎爾哈部降其衆取其地九年四月師還加三等梅勒章京授白奇超哈章京崇德元年從武英郡王阿濟格等伐明入長城與額駙蘇納帥師攻容城先登克之三年授議政大臣復從武英郡王阿濟格攻皮島督擺牙喇兵渡江先至岸與固山額眞阿山葉臣等共攻克之斬其守將沈世魁進二等七月授工部承政四年與刑部承政索海分將左右翼伐索倫部

人達爾布尼阿哈木都戶白庫都漢必爾代據厄庫爾城拒我師薩穆什喀合左右翼攻克之進攻鐸陳未下牛象額真薩必圖等引兵助攻鐸陳阿撤二城兵潛出邀戰薩穆什喀設伏敗之斬七十人五年師還上郊勞賜宴吏贖薩穆什喀伐索倫得三屯復叛其長博穆博果爾掠正藍旗糧重坐視不救當削職籍沒上命削職貫籍沒薩穆什喀陳辨博穆博果爾掠糧重率兵追擊里許乃與右翼索海等兵遇索海等攘功上命王貝勒議政大臣勘毅以薩穆什喀言妄論死上特宥之復追論成海州時備不嚴屯丁爲敵殺論罰緩七年從伐明攻錦州敵犯塞薩穆什喀力戰敵三至三卻錦州下復授世職牛象章京八年卒子羅什襲職雅賴扈爾漢第七弟也事太祖從伐烏喇略地朝鮮數被創從攻遼東破蒙古兵從伐察哈爾先登殺敵天聰三年五月與甲喇額真顯璧等將千人略明新城路遇毛文龍舊部采參者斬六十人毀其舟九月從揚古利逐逃人雅爾古復遇文龍部衆殺九千六百餘人獲千總三及從者十六十一月太宗伐明溥明都袁崇煥來援攻擺牙喇兵城兵出應雅賴力戰却之五年

從攻大凌河屢勝嘗單騎入敵陳出戰死者尸七年取旅順口與薩穆什喀同舟先濟敵據岸列陣以拒雅賴超躍登岸大呼曰雅賴先登矣遂入敵陳黎明與敵戰入城被創戰益奮我兵或少卻輒手刃之城下授世職備禦崇德二年授議政大臣八年加半個前程順治初從入關擊李自成二年從破自成兵瀋關定河南江南論功遇恩詔進一等阿思哈尼哈番兼拖沙喇哈番八年三月擢戶部尚書四月坐駐防河間牛象額眞碩爾對訐告發饑不均罷並削拖沙喇哈番康熙三年卒乾隆初定封三等男

洪尼雅喀吳扎庫氏世居噶哈里太祖初起時扈倫諸部方強烏喇尤橫肆聞洪尼雅喀以材武豪於所部刳其孥迫使歸附洪尼雅喀既借往念烏喇貝勒不足事中途棄走與弟薩蘇喀薩穆唐阿率其族四十人歸太祖授牛象額眞俾領其衆隸滿州鑲紅旗天命三年從伐明有功擢甲喇額眞天聰二年太宗自將伐明攻錦州師薄城洪尼雅喀先登毀其堞墜傷足敵迫之將執而繫焉季弟薩穆唐阿以壯達從軍馳護鬪死洪尼雅喀乃免八年五月授世職三等

甲喇章京尋卒子武拉禪武拉禪襲世職順治元年授擺牙喇甲喇額眞十月從豫親王多鐸西討李自成十二月至潼關甫立營賊掩至擊却之二年從端重親王博洛下浙江趨平湖敗敵獲戰艦進略杭州馬士英方國安擁衆來攻武拉禪與戰於赫山於朱橋於范村屢勝四年授鎮紅旗蒙古梅勒額眞五年正月增設滄州大名駐防命武拉禪以梅勒額眞駐大名金聲桓爲亂從征南大將軍譚泰攻南昌五合五勝聲桓以步騎七萬拒戰率本旗兵合擊大破之聲桓既死剿餘寇於袁州擊敗明將朱翎鏗定府一縣二六年七月有趙鳳岡者爲亂於畿南武拉禪討之斬鳳岡殲其衆千人別遣甲喇額眞哈其哈等擊賊寶山村獲其渠田東樓楊牌子七年五月授刑部侍郎叙功遇恩詔世職屢進尋定爲二等阿思哈尼哈番十二年從甯海大將軍宜爾德攻舟山明將陳六御等以三萬人拒戰武拉禪督叢奮擊以功進一等阿思哈尼哈番復以恩詔加拖沙喇哈番十六年領侍衛內大臣額爾克戴青家奴歐侍衛阿拉那於市武拉禪勘獄反罪阿拉那坐枉抑削所加拖沙喇哈番十七年以病免康熙

六年十月卒薩蘇喀洪尼雅喀仲弟也事太祖授擺牙喇甲喇額眞天命七年從太祖伐明攻廣甯戰於沙嶺我師有都爾根者馬蹶敵騎三共取之兩刃交下薩蘇喀馳入敵陳躍馬大呼斬一人排一人撲地遂翼之出無敢逼者天聰三年從太宗伐明薄明都薩蘇喀爲前驅偵敵五年師圍大凌河城兵突出薩蘇喀率兵追擊及壕而返城兵尋復出又擊敗之八年二月略明前屯衛從噶什布賢噶喇昂邦勞薩擊敗甯遠兵獲馬二十有二六月師至大同以三十人偵左衛敵三百屯城外奮擊敵潰走逐之至城下斬獲甚衆九年從貝勒多爾袞招察哈爾林丹汗子額哲進略明邊固山額眞圖爾格設伏敗敵潰走薩蘇喀躡其後斬級最授半個前程尋擢禮部參政崇德二年與甲喇額眞丹岱等以八十人略明邊次清河敵七百屯守與戰大勝獲驘二馬二十餘五年圍錦州守木魯河六年圍松山八年攻甯遠取中後前屯衛戰比有功順治初擢鎮紅旗滿洲梅勒額眞從入關擊李自成與梅勒額眞和託共驅入敵營中砲沒贈三等甲喇章京

阿山伊爾根覺羅氏世居穆溪父阿爾塔什率阿山及諸子阿達海濟爾琿噶賴以七村附太祖太祖妻以同族女兄弟號額駙而以阿山等屬貝勒代善代善置閒散觖望與諸弟及其子塞赫等逃之明上收其孥貝勒阿敏以兵追之射斃阿山二子阿山亦被創兄弟相失穆克譚追射阿達海阿達海斫穆克譚墜馬幾死遂奪其馬與阿山等入明邊尋復自歸太祖問其故對曰舉族相投矢効命疆場豈直充斲役乎乃置諸左右旗制定隸滿洲正藍旗天命六年從伐遼陽授二等參將太宗卽位旗置大臣一爲將其次置大臣二爲佐又其次置大臣三備調遣使阿山佐正白旗阿達海與同旗備調遣是歲貝勒代善等帥師伐扎魯特部上令阿山與冷格里以兵六百入喀爾喀巴林部逐邏卒縱火張軍威師還進三等副將天聰元年從伐朝鮮克義州阿達海坐匿太祖御用兜鍪鞭五十又遼上命爲貝勒多鐸媒聘國舅阿布泰女論死上宥之命奪官籍其家之半阿達海託言捕魚以十騎踰赫圖阿喇城遁克徹尼追之還阿達海私語從人曰我欲亂箭射殺克徹尼如爾輩何語聞上命誅之三年秋阿

山復與弟噶賴子塞赫及阿達海子查塔莫洛渾奔明甯遠上收其孥遣兵往追之阿山等將入明境遣從者先明守塞兵執而殺之阿山等懼復還請罪上復宥之還其孥使復職阿山乃許雅蓀與同謀雅蓀者起微賤以葉赫攻兀扎魯城時戰有功太祖寵任之雅蓀矢言殉太祖太祖崩不果殉臨喪慢至是鞠得實遂坐誅冬從上伐明克洪山口城薄明都軍於城東南阿山與圖魯什周視敵營請速進攻上命卽夜漏三下列陳詰旦遂戰大破明軍陳斬武經略滿桂等四年攻永平上命阿山及葉臣選部下猛士二十四人乘夜挾雲梯以攻諭曰登梯當令四人先分立梯端二旁次令四人登又次令十六人相繼上又次則爾曹督其後復令各旗出將一兵千人助攻次日日加寅薄城樹梯犯矢石奮戰俄城上砲裂藥發敵兵自驚擾阿山督所部冒火銳上諸軍繼進遂克其城五年攻大凌河率銳騎進錦州松山俘明兵明守將出援與勞薩圖魯什以三百人敗其衆二千斬百餘級獲糧三上勞以金卮尋授固山額眞六年上自將伐察哈爾阿山與梅勒額眞布爾吉方行邊聞上至西拉木倫河帥師來

會上命率精騎三百助圖魯什爲前驅察哈爾汗遁去上引還復命阿山等帥師防邊七年與布爾吉偵鹿島多所俘獲八年與圖魯什略錦州貝勒岳託謂圖魯什曰軍中調遣當就阿山商權勿違其言既復從伐察哈爾斬蒙古逃人追錄克永平功進三等昂邦章京免徭役並分以虎爾哈俘百人隸所領牛衆九年師入明邊略山西明兵自山海關赴援上命貝勒多鐸軍廣甯阿山與固山額真石廷柱率噶布什賢兵四百前驅趨錦州明副將劉應選等以兵二千五百人來禦遇於大凌河將戰多鐸後軍驟至自山而下士馬騰踴軍容甚盛明兵驚沮阿山突起掩擊我師從之陳斬應選殲其兵五百克臺堡一師還賜良馬鎧甲崇德元年從武英郡王阿濟格伐明下鵬鵠長安嶺二城率本旗兵獨克東安縣師還明兵來追阿山殿擊斬略盡二年取皮島與葉臣將左翼舟師攻其西北隅先登斬守將沈世魁進一等昂邦章京世職六年八月復圍錦州城兵突圍出攻我師松山守將潛謀奪火器阿山迭擊敗之七年十月復從貝勒阿巴泰伐明入牆子嶺轉戰至兗州師還資銀幣順治元年從入關擊李



自成自成敗走阿山借左翼梅勒額真阿哈尼堪右翼固山額真馬喇希濟藩  
津擊破之克平陽以功進三等公二年豫親王多鐸自陝西移師下江南阿山  
及諸將從與馬喇希等取淮河橋渡淮拔揚州李舟師沂江上克江甯獲明福  
王江南既定從貝勒博洛固山額真拜音圖徇浙江師次杭州明潞王常澆降  
嘉興湖州紹興甯波嚴州皆下師還資金銀鞍馬阿山自太宗時屢坐事被論  
輒貸之三年坐妄聽巫者言罪所部被訐罷官奪世職旋復授一等昂邦章京  
四年改一等精奇尼哈番旋卒乾隆初定封一等男從弟阿爾津自有傳

論曰太祖時鄰近諸部族歸附常書兄弟最先康果禮等最衆其子孫皆能以  
驍勇自効博爾晉雅希禪殺敵致果蓋勞薩圖魯什之亞也揚善冷格里薩穆  
什喀皆有戰績非藉父兄顯者洪尼雅喀尤以材武名阿山屢去復歸誅弟而  
用兄駕馭臬桀惟恩與法握其要矣